

# JETA E ELIAS

---

Teksti original: Ruth P. Overholtzer

Përshtatur për Evropë: Chris dhe Jennifer Haaijer

Përkthyes: Andi Stefanllari

JU LUTEMI VINI RE!

Vizualet për këtë seri mund të blihen në pjesën më të madhe të zyrave të BUF-it dhe në dyqanet në internet. Për një listë të zyrave të BUF-it dhe dyqaneve në internet në Evropë, ju lutemi vizitoni [www.teachkids.eu/al](http://www.teachkids.eu/al) dhe kliko mbi “Vendet”.



**BUF SH**

BASHKËSIA E UNGJILLIZIMIT  
TË FËMIJËVE E SHQIPËRISË®

Copyright © 1998, 2008 Child Evangelism Fellowship® Inc.

Të gjitha të drejtat e rezervuara. Përdorur me leje.

Mund të riprodhohet vetëm për përdorim personal, shërbese, jofitimprurës ose jo-komercial. Vizitoni [www.teachkids.eu/al](http://www.teachkids.eu/al) për më shumë detaje mbi lejen e përdorimit.

## Pasqyra e Lëndës

<b>Mësimi</b>		<b>Faqja</b>
1	Lajmi tronditës i Elias	3
2	Elia lufton kundër perëndisë së rremë	7
3	Elia largohet nga Mbretëresha Jezebel	11
4	Elia dhe vreshti i Nabothit	17
5	Elia shkon në Qiell	20
6	Elia flet me Zotin Jezus	24

## Hyrje

Emri “Elia” do të thotë “Jehovai është Perëndia”. Ai ishte një Tishbit. Tishbiti ishte në të njëjtën zonë të Galaadit me përroin Kerith - në anën lindore të Jordanit, në veri të lumit Jabbok. (Mund të përdorni edhe një hartë me fëmijët). Shërbesa e tij zgjati për rreth 28 vjet (nga 924 deri në 896 para Krishtit) gjatë mbretërimit të Ashabit dhe Ahaziait në Izrael (dhe Jehoshafatit në Judë). Ai dëshmoi veçanërisht para popullit të Izraelit për Perëndinë e vërtetë e të gjallë.

Ndërsa jepni këto mësimë, sigurohuni që të mos tërhiqeni nga tregimi, duke lënë mënjanë të vërtetat e Biblës. Caktoni si pikësynim që të jepni në mënyrë tërësore Të Vërtetën Qëndrore të çdo mësimi. Është një ide e mirë të shkruani Të Vërtetën Qëndrore në një copë letër a karton e ta vendosni atë në flanelograf. Kjo i ndihmon fëmijët ta fiksojnë në kujtesën e tyre.

Skica të shkurtëra të mësimëve jepen në fillim të çdo mësimi.

Ato tregojnë ku jepet e Vërteta Qëndrore (VQ) në mësim dhe ku zbatohet ajo.

P - nënkupton zbatimin për fëmijët e pashpëtuar;

SH - nënkupton zbatimin për fëmijët e shpëtuar.

Praktikimi i mjeteve figurative dhe ndryshimi i skenave përpara dhënies së mësimit është diçka racionale. Sfondet e çdo skene janë vërtet të dobishme, por nuk janë të domosdoshme. Kjo seri mund të shpjegohet në një sfond të hapur të Biblës ose në një sfond të thjeshtë.

Fëmijët mund të kenë pyetje ose shqetësime shpirtërore si rezultat i asaj që mësojnë gjatë këtyre mësimëve. Në një moment të programit, bëjuni të ditur shkurt dhe qartë se jeni i gatshëm t'i ndihmoni ata. Tregojuni ku t'ju gjejnë në fund të takimit. Kjo përfshihet në tri nga mësimet e kësaj serie.

# Mësimi Një

## Lajmi tronditës i Elias

<b>Shkrimi:</b>	1 Mbretërve 17:1-6
<b>E Vërteta Qendrore:</b>	Perëndia mund të bëjë gjëra të mëdha.
<b>Zbatimi:</b>	Për fëmijët e <b>Pashpëtuar</b> : Besojini Atij për të bërë punën e madhe të shpëtimit në jetën tuaj. Për fëmijët e <b>shpëtuar</b> : Kur gjërat janë të vështira, mbështetini shpresat tek Ai për të bërë gjëra të mëdha për ju.
<b>PLANI I MËSIMIT:</b>	
<b>Fillimi:</b>	Takoni mbretin më të lig që ka pasur ndonjëherë Izraeli.
<b>Zhvillimi e ngjarjeve:</b>	Elia sjell mesazhin e Perëndisë. VQ Perëndia dërgon Elian në përroit Kerith. Elia pi ujë në përrua. Elia ushqehet prej korbave. VQP Perëndia i thotë Elias: “Shko në Sarepta”. Elia bindet. VQSH Elia takohet me vejushën.
<b>Pika Kulmore:</b>	Perëndia bën një mrekulli me vaj dhe miell. VQSH
<b>Përfundimi:</b>	Mbreti Ashab vazhdon të ndjekë Elian. VQP
<b>Vargu që do mbajtur mend</b>	<i>“Jotja o Zot, është madhështia, fuqia, lavdia, shkëlqimi, madhëria, sepse gjithçka që është në qiell dhe mbi tokë është jotja” (1 Kronikave 29:11)</i>

## Mësimi

### Piktura 1-1

#### *Lajmi i Elias për Mbretin Ashab*

Takoni mbretin më të lig që ka pasur ndonjëherë Izraeli . Emri i tij është Mbreti Ashab. Ai ishte martuar me një grua të quajtur Jezebel. Jezebel vinte nga një vend ku njerëzit nuk adhuronin Zotin, por adhuronin një perëndi të bërë nga guri të quajtur Baal. Ashabi nuk i mësoi Jezebelit Perëndinë e vetëm të vërtetë. Madje, ai e lejoi atë të sillte adhurimin e Baalit në Izrael.

Shumë Izraelitë po largoheshin nga Perëndia Zot dhe adhuronin këtë perëndi prej guri.

A do të lejonte Perëndia njerëzit e Tij të largoheshin prej Tij drejt një perëndie prej guri? Jo! A do të thoshte Ai: “Është për të ardhur keq, por unë s’kam ç’bëj?” Jo! Në atë moment, njeriu që fliste për Perëndinë po kalonte me hap të madh shkallët e mermerta të pallatit .

## Piktura 1-2

Ai shkoi para mbretit dhe me ton të ashpër tha: "Ashtu siç është e vërtetë që rron Zoti, Perëndia e Izraelit, të Cilit unë i shërbej, nuk do të ketë as shi dhe as vesë gjatë këtyre viteve, veçse me fjalën time!" Kush ishte ky njeri? Emri i tij ishte Elia. Ai vinte nga një fshat i vogël sipër në kodra. Ai nuk ishte dikush që mund ta shihje në pallat! Ai ishte lajmëtari i Perëndisë. Bibla e quan atë profet.

Pasi i tha mbretit se çfarë do të ndodhte, u largua nga pallati. Lajmi i Perëndisë ishte: "Nuk do të ketë as shi dhe as vesë gjatë këtyre viteve, veçse me fjalën e Elias!" Nuk ishte Elia që po e ndalte shiun, por Perëndia. Kjo ishte diçka që mund ta bënte vetëm Perëndia. A ka planifikuar ndonjëherë familja juaj të shkojë në piknik? Ndodhi që ra shi dhe nuk mundët të shkoni. Ju do të kishit dëshiruar ta ndalonit shiun, por kjo ishte e pamundur. Por kjo nuk është e pamundur për Perëndinë. Ai mund të bëjë gjëra të mëdha, që askush tjetër nuk mund t'i bëjë. Ai krijoi shiun. Pra, Ai mund të urdhërojë kur të bjerë shi dhe kur të pushojë. Tani Ai po e ndalte shiun për të ndëshkuar këta njerëz, që ishin kthyer tek një perëndi tjetër që s'ishte aspak Perëndi! Që nga ai çast nuk kishte më shi. Padyshim, kjo do të thoshte që të lashtat do të merrnin fund dhe do të kishte shumë pak ushqim.

## Piktura 1-3

Mbreti Ashab dhe Mbretëresha Jezebel donin ta vrisnin Elian. Ç'mendonin se do të ndodhte tani me Elian? (*Lini pak kohë për përgjigje*) Po, Perëndia e mbrojti Elian dhe i tregoi se ku të shkonte për t'u fshehur: "Largohu prej këtej dhe fshihu pranë përroit Kerith."

Por kishte edhe një problem tjetër - ç'do të hante dhe ç'do të pinte Elia? Perëndia do të përdorte disa lajmëtarë të veçantë për ta ushqyer atë. Kush ishin këta? Zogjtë! Zogjtë! Po, - tha Perëndia: "Do të pish ujë në përrua dhe unë kam urdhëruar korbat që të të japin të hash atje."

## Piktura 1-4 Elia ushqehet nga korbat

Menjëherë Elia bëri atë që e kishte urdhëruar Zoti. Ai ishte në gjendje të fshihej pranë përroit, ku pinte ujë nga një rrëke e vogël. Por shpejt u ndje i uritur. Dhe befas

dëgjoji përplasjet e krahëve të zogjve lshin zogj të mëdhenj e të zinj, të quajtur korba që fluturonin drejt tij. Në sqepat e tyre ata mbartnin mish e bukë që ia sillnin Elias. Normalisht, korbat hanë çdo lloj mishi që mund të gjejnë. Ishte e çuditshme që ato i sollën mish Elias. Ndodhi ashtu siç kishte thënë Perëndia. Perëndia kishte bërë diçka tjetër të madhe që askush tjetër nuk mund ta bënte! Ai i krijoi korbat. Dhe Ai mund t'ju thoshte atyre se ç'duhet të bënin. Ai mund t'i bëjë këto gjëra, sepse Ai ka më shumë forcë dhe fuqi se çdokush tjetër. Në Bibël thuhet: "Jotja, o Zot, është madhështia, fuqia, lavdia, shkëlqimi, madhëria, sepse gjithçka që është në qiell dhe mbi tokë është jotja." (1 Kronikave 29:11) Perëndia ka fuqi mbi këdo dhe mbi gjithçka; Ai krijoi gjithçka, madje edhe korbat. Bibla na tregon shumë, shumë gjëra të mëdha që ka bërë Ai. (*Nëse fëmijët tuaj kanë njohuri mbi Biblën, kërkojuni t'ju thonë disa nga këto vepra*).

Puna më e madhe që ka bërë Ai është shpëtimi i mëkatarëve. Ju e kuptoni se ti dhe unë dhe gjithë njerëzit në botë nuk i janë bindur Perëndisë. Mendoni për veten tuaj. A i ke bërë titur ndokujt me fjalë të këqija dhe lënduese? Ndoshta, vëllai yt nuk të la të luash me trenin e tij elektrik. Ti u zemërove shumë dhe i bërëte atij. Madje, i the: "Të urrej". Kjo e zemëron Perëndinë. Ky është mëkat. Ndoshta, prindërit të kanë thënë të mos i japësh kurrë biçikletës në rrugën kryesore. Ata nuk dinë, por ju e keni bërë këtë. Edhe ky është gjithashtu mëkat. Perëndia urdhëron: "Nderoje atin tënd dhe nënën tënde" (Eksodi 20:12). Kjo do të thotë që duke mos dëgjuar prindërit, ti mëkaton kundër Perëndisë. Po, jeta jote është gjithë mëkate. Mëkati që kemi bërë na mban larg Perëndisë dhe s'mund të jemi kurrë aty ku ndodhet Ai. Ky është një problem *i madh*. Ti mund të përpiqesh ta zgjedhësh këtë problem duke u sjellë mirë, duke u lutur apo duke shkuar në kishë. Por këto veprime nuk e zgjidhin problemin. Ti ende ke mëkat në jetën tënde, i cili të mban larg nga Perëndia. As njerëzit e mençur, as njerëzit fetarë dhe as njerëzit e famshëm nuk mund ta zgjidhin këtë problem të madh. Por Perëndia mund të bëjë gjëra, që të tjerët nuk i bëjnë. Asnjë problem nuk është i madh për Të. As edhe problem i mëkatit! Ai dha Birin e Tij të vetëm, Jezus Krishtin, për të vdekur në kryq, për t'u ndëshkuar për mëkatin. Jezus Krishti u dënua nga Perëndia për mëkatin e gjithë botës. Perëndia e ngriti Atë së vdekuri dhe kjo tregoi

se vdekja e Krishtit me të vërtetë e zgjidhi problemin e mëkatit. Tani, nëse ju mbështeteni te Zoti Jezus që të heqë mëkatit tënd, Ai e bën këtë për ty dhe ti vendos marrëdhënie të drejta me Perëndinë. Bibla thotë: "Shpëtimi vjen prej Zotit" (Jona 2:9). Vetëm Perëndia mund të shpëtojë. Dhe Ai mund ta bëjë këtë punë të madhe në jetën tuaj. Sa i mrekullueshëm është Ai! Edhe Elia po e zbulonte këtë. Çdo mëngjes dhe çdo mbrëmje korbant vinin me ushqim, të dërguar nga Krijuesi i tyre, Perëndia. Çdo ditë Elia pinte ujë nga përroi i vogël. Çdo ditë Perëndia e ruante atë të sigurt! Si mendoni ju, ç'mësim po merrte Elia?

*(Lejoni fëmijët të përgjigjen - për shembull, Perëndia është i plotfuqishëm, besnik, dhe siguron gjithçka.)*

Koha kalonte. Në përrua kishte gjithnjë e më pak ujë. Shpejt ai do të thahej. A do të vdiste Elia prej etjes? Jo, Perëndia po kujdesej për të. Perëndia i Elias mund të bënte gjëra të mëdha për të siguruar që shërbyesi i Tij të mos vdiste. Perëndia i tha Elias të shkonte në qytetin e Sareptas që nuk i përkiste Izraelit. "Unë kam urdhëruar një grua të ve që të të sigurojë ushqimin" - i tha Perëndia Elias. Elia u nis për në Sarepta. Ai e dinte se Perëndia do të kujdesej për të! Djem e vajza të krishtera, mbani mend se Perëndia mund të bëjë gjëra të mëdha për fëmijët e Tij. Mund t'i besosh Atij të kujdeset për ty edhe kur ndodhin gjëra të vështira. Unë njoh një vajzë që i besoi Zotit Jezus dhe padyshim jeta e saj ishte krejt ndryshe. (Kjo është një ngjarje e vërtetë). Nëna e saj donte që ajo të shkonte në diskotekë, por asaj nuk i pëlqente. Ajo e ndjente se diskoteka nuk ishte vendi ku Zoti Jezus donte që të ishte ajo. Por nëna e saj insistonte: "Ti duhet të shkosh". Kështu ajo iu bind të ëmës. E merrni me mend se ç'ndodhi! Ndërsa nëna e saj po e shpinte atë me makinë në diskotekë, makinës iu shpuan dy goma! Ato s'arritën kurrë të shkonin në diskotekë. Perëndia bëri diçka të madhe për vajzën e krishterë. Mbani mend, kur keni probleme ose vështirësi nuk është aspak e vështirë për Perëndinë. Besojini Atij që ta zgjidhë atë. Ai mund të bëjë gjëra të mëdha për ju, ashtu siç bëri për Elian.

## **Piktura 1-5**

### *Elia ushqehet nga gruaja e ve*

Ishte një udhëtim i gjatë e i vështirë prej 160 kilometrash për në Sarepta. Elia duhej të ecte. Ai duhej të udhëtonte fshehurazi, sepse

mbreti ende e kërkonte. Por Perëndia e ruante atë të sigurt. Kur profeti arriti në portën e qytetit, ai pa një grua që mbledhte dru për të nderur zjarr. Ai i thirri dhe i tha: "Shko dhe më merr pak ujë." Gruaja shkoi të merrte ujë. Ndërsa po shkonte, ai shtoi: "Më sill edhe një copë bukë, të lutem."

Gruaja u përgjigj: "Ashtu siç është e vërtetë që rron Zoti, Perëndia yt, bukë nuk kam, por kam vetëm një dorë miell në një enë dhe pak vaj ulliri në një qyp; dhe tani po mbledh dy copa dru për të bërë zjarr, në mënyrë që të pjek bukë për birin tim dhe për vete. Pasi të hamë këtë, nuk do të kemi asgjë për të ngrënë dhe kemi për të vdekur."

Elia u përgjigj: "Mos ki frikë, kjo është ç'ka thotë Zoti, Perëndia i Izraelit: ena e miellit nuk do të mbarojë dhe qypi i vajit nuk do të pakësohet deri ditën që Zoti të dërgojë shiun mbi tokë."

## **Piktura 1-6**

Gruaja e ve poqi bukë. Ajo i dha një pjesë Elias, një pjesë birit të saj dhe një pjesë e hëngri për vete. Shpejt buka mbaroi dhe ajo duhej të piqte tjetër. A do të kishte më miell e vaj? E përfytyroni atë duke shkuar tek ena, duke e kthyer atë ngadalë? Po, ajo nuk dukej bosh! Ajo derdhi pak vaj. Gruaja shikoi brenda në enë dhe vuri re se kishte miell të mjaftueshëm për të bërë bukë tjetër. Ç'mrekulli! Kur u kthye sërish, ende kishte vaj dhe miell! Si ndodhi kjo? Kjo ishte diçka që vetëm Perëndia mund ta bënte dhe Ai e bëri për t'u kujdesur për Elian, gruan e ve dhe birin e saj. Perëndia ende bën gjëra të mëdha për t'u kujdesur për fëmijët e Tij. Nëse e do Zotin Jezus Krisht, mbaj mend se Perëndia është i tillë edhe sot. Ai mund të mos bëjë të njëjtat gjëra për ju, siç bëri për Elian, por Ai mund të bëjë edhe për ty gjëra të mëdha. A ke një problem që është tepër i madh për ty - tregojë Perëndisë. Kur të jesh në rrezik, ki besim te Perëndia që të të sigurojë. Ndoshta ti je i vetmi i krishterë në familjen tënde dhe do të dëshiroje që edhe nëna, babai dhe vëllezërit tuaj të njihnin gjithashtu Zotin. Kërkoji Perëndisë të bëjë gjëra të mëdha. Ai mund të mos bëjë pikërisht atë që i kërkon. Mund të mos e bëjë atë menjëherë. Por Ai është Perëndia i Plotfuqishëm që mund të bëjë gjëra që askush tjetër nuk mund t'i bëjë. "Për Perëndinë çdo gjë është e mundur" (Mateu 19:26). Ja pse Elia ishte i sigurt dhe me kaq përkujdesje.

Po Mbreti Ashab?

Po të kishte vazhduar rrugën e tij, gjërat do të kishin shkuar ndryshe. Ai akoma nuk e pranonte që ishte Perëndia Zot që dërgonte dhe ndalonte shiun. Mbreti, mbretëresha dhe populli, pavarësisht nga gjërat e mëdha që kishte bërë Perëndia, ende vazhdonin në mënyrën e tyre mëkatore. Sot ju dëgjuat për disa nga këto gjëra. E mbani mend se cila është vepra më e madhe që ka bërë Perëndia? *(Lini fëmijët të përgjigjen)*. “Shpëtimi i përket Zotit” (Jona 2:10). Shpëtimi i një djali ose një vajze është diçka që vetëm Perëndia mund ta bëjë. A të ka shpëtuar Perëndia nga mëkati? Nëse s’ke besuar

kurrë te Zoti Jezus, që të rregullojë marrëdhëniet e tua me Perëndinë, të lutem mos mendo se kjo është diçka që mund ta bësh vetë. Ti e ke të pamundur. Ti duhet të besosh Zotin Jezus Krisht. Bëje këtë sot. Tregoji atij se në zemrën tënde të vjen keq që ke qenë i keq, falënderoje Zotin Jezus që u dënua për mëkatin tënd, kërkoji të të shpëtojë nga mëkati. Në qoftë se e bën këtë tani, në çast Perëndia do të rregullojë marrëdhëniet e tua me Jezus Krishtin. Sa e mrekullueshme është kjo! Vetëm Perëndia mund ta bëjë këtë dhe Ai mund ta bëjë për ju, sepse Perëndia mund të bëjë gjëra të mëdha.

### **Pyetje Përsëritëse për Mësimin Një**

1. Si quheshin Mbreti dhe Mbretëresha e ligë, të cilët Perëndia i paralajmëroi nëpërmjet Elias?  
*(Ashab dhe Jezebel)*
2. Pse e pushoi Perëndia shiun për 3 vjet e gjysmë?  
*(Sepse Izraelitët po largoheshin nga Perëndia i vërtetë për të adhuruar Baalin).*
3. Si e bëri Perëndia të mundur fillimisht që Elia të kishte ushqim dhe ujë?  
*(Perëndia i tha të shkonte te përroi Kerith dhe urdhëroi korbat që ta ushqenin atje).*
4. Cila është puna më e madhe që ka bërë Perëndia? *(Ai shpëton mëkatarët).*
5. Kë kishte përgatitur Perëndia për t’u kujdesur për Elian pasi të thahej përroi?  
*(Një grua të ve në Sarepta).*
6. Çfarë duhet të bëjmë ne si të krishterë kur ndodhemi në situata të vështira si vajza që i kërkuan të shkonte në diskotekë? *(Të besojmë dhe t’i bindemi Perëndisë).*
7. Çfarë po bënte gruaja kur Elia mbërriti te porta e qytetit dhe Perëndia i tha atij që t’i fliste gruas?  
*(Ajo po mbledhte dru për zjarr që të gatuate ushqimin e fundit).*
8. Çfarë i kishte mbetur gruas për të ngrënë?  
*(Një grusht miell në një enë dhe pak vaj ulliri në një qyp).*
9. Cili ishte premtimi i Perëndisë për gruan në qoftë se ajo do të ushqente Elian?  
*(Ena me miell nuk do të mbaronte dhe qypi me vaj nuk do të pakësohej deri ditën që Zoti do të dërgonte shiun mbi tokë.)*
10. Cili është vargu që mësuam përmendsh, i cili na ndihmon të kujtojmë sa i madh është Perëndia ynë? *(Thoni përmendesh 1 Kronikave 29:11).*

## Mësimi Dy

### Elia lufton kundër perëndisë së rremë

<b>Shkrimi i Shenjtë:</b>	1 Mbretërve 18: 1, 2, 17-46
<b>E Vërteta Qendrore:</b>	Zoti është Perëndia i vetëm i vërtetë.
<b>Zbatimi:</b>	Për fëmijët e <b>pashpëtuar</b> : Shkoni pas Tij. Për fëmijët e <b>shpëtuar</b> : Binduni Atij gjatë gjithë kohës.
<b>PLANI I MËSIMI</b>	
<b>Fillimi:</b>	“Ku mund të jetë ai?” VQ
<b>Zhvillimi e ngjarjeve:</b>	Elia largohet nga Sarepta me urdhër të Perëndisë. VQSH Elia takohet me Ashabin. Elia thërret mbretin, “priftërinjtë” dhe popullin në malin Karmel. Elia deklaron: “Nëse Zoti është Perëndia, shkoni pas tij.” VQP Elia vazhdon të flasë e të japë udhëzime. VQSH Priftërinjtë e Baalit thërrasin perëndinë e tyre. S’ka asnjë përgjigje. VQ Elia përgatit altarin dhe lutet. Befas ra zjarri.
<b>Pika kulmore:</b>	Populli thërret: “Zoti është Perëndia.” VQP Elia vret priftin e Baalit. Elia lutet për shi.
<b>Përfundimi:</b>	Shfaqen re të zeza. Bie shi. VQSH + P
<b>Vargu që do mbajtur mend:</b>	Përsërisni vargun që mësuat javën që shkoi. (Nëse mësimin e përdorni më vete, propozojmë vargun e mëposhtëm: “Unë jam i pari dhe i fundit, dhe përveç meje nuk ka Perëndi.” <i>Isaia 44:6.</i> )

## MËSIMI

### Piktura 1-6 *Elia ruhet i sigurt*

“Ku mund të jetë?” Koha kalonte dhe njerëzit që kishte çuar Mbreti Ashab nuk ishin në gjendje të gjenin Elian. Mbreti i kishte dërguar ata në të gjitha vendet e fshehta, po Elia s’gjendej gjëkund. Ku të ishte ai? E kujtoni? Po, ai ishte në Sarepta. Po qëndronte me gruan e ve dhe djalin e saj. Kishin kaluar tre vjet dhe çdo ditë ata hanin bukë të bërë nga mielli dhe vaji që s’mbarohej kurrë.

Në atë kohë Perëndia siguroi gjithçka që Elia të mos zbulohej.

Toka u tha e u dogj. Mbaroi edhe bari i gjelbër. Burimet kishin shterur të gjithë. S’kishte asnjë pikë ujë për gjënë e gjallë, që po ngordhte. Madje, edhe njerëzit ishin të etur e të uritur. Dhe mbreti i keq e budalla mendonte se po të kapte e të vriste Elian, gjithçka do të rregullohej! Por Ashabi e kishte gabim. Ishte Perëndia që kishte ndaluar shiun. Bibla na thotë se Ai është krijuesi i shiut dhe

Ai e ka atë nën kontroll. Ai krijoi diellin, hënën, lulet, pemët, detet, erën dhe gjithçka tjetër dhe Ai i ka ato nën kontrollin e Tij. Kohë më parë disa njerëz besonin se detet, të lashtat dhe familjet kishin secila Perëndinë e vet. Madje, edhe sot ka njerëz që besojnë në ekzistencën e Perëndive të ndryshme. Por Bibla na thotë se ekziston vetëm një Perëndi, Perëndia për të cilin ne lexojmë në Bibël. Ai thotë: “Unë jam i pari dhe jam i fundit, dhe përveç meje nuk ka Perëndi.” (Isaia 44:6) Mbreti Ashab duhet ta dinte këtë, por ai si dhe shumë njerëz të tjerë në Izrael, besonin në Perëndinë e rreme Baal. Ai e urrente njeriun që fliste për Perëndinë e vetëm e të vërtetë. Ai po e kërkonte atë ta vriste.

Në qetësinë e Shtëpisë në Sarepta foli Zoti: “Shko t’i thuash zotërisë tënd: Elia është këtu! Unë do të dërgoj shi në tokë.”

## **Piktura 2 -1**

### *Elia takohet me Mbretin Ashab.*

Kështu, Elia zbriti në tokën e Izraelit. A nuk ishte një veprim tepër i rrezikshëm? Po! Por Elia e dinte se Zoti ishte Perëndia i vetëm dhe se Ai është Perëndi mbi gjithçka. Elia e dinte se Ai i kishte të gjitha të drejtat t’i thoshte atij se ç’duhej të bënte. Elia e dinte atë sepse Zoti është Perëndia i vetëm i Gjithëpushtetshëm që ai duhej t’i bindej. Natyrisht, ai e dinte se Perëndia i tij i vetëm do të kujdesej për të! Këtë s’duhet ta harrojmë edhe ne të gjithë. Perëndia është i vetëm, Ai është Zoti mbi gjithçka. Ai është shumë i madh. Ne jemi shumë të vegjël. Ne duhet t’i bindemi Atij kur na thotë të bëjmë diçka. Ne s’duhet të paraqesim shfajësim. Perëndia na thotë të ndihmojmë ata që kanë nevojë. Pra, nëse ka ndonjë në klasën tënde që është tepër i ndrojtur, bëhuni shoku i tij për ta ndihmuar që të luajë së bashku me ju. Perëndia ju urdhëron t’ju bindeni prindërve. Prandaj mos u hiqni sikur se dëgjoni nënën tuaj kur u thotë të mbyllni televizorin. Zoti, Perëndia i vetëm, na thotë: “Mos kini zili.” Kështu, kur lakmoni lodrat e shokut, rrëfejani Perëndisë mendimet tuaja lakmitare, kërkojini Atij falje dhe ndihmë që të mos përjetoni më mendime të tilla ziliqare. Ju duhet t’i bindeni atij sikundër iu bind Elia që vajti te Mbreti Ashab. Sa e pa Elian, Ashabi e pyeti: “Ti je pikërisht ai që bën rrëmujë Izraelin?”

Elia nuk kishte frikë nga mbreti. Ai u përgjigj prerë: “Nuk jam unë që po e bëj

rrëmujë Izraelin, por ti dhe shtëpia e atit tënd, sepse keni braktisur urdhërimet e Zotit dhe keni shkuar pas Baalëve. Prandaj dërgo tani të thërrasin tërë Izraelin pranë meje në malin Karmel, bashkë me katërqind e pesëdhjetë profetët e Baalit dhe katërqind profetët e Asherahut.” *“(Asherahu mendohej të ishte perëndeshë.)”*

Dhe mbreti i keq bëri siç i tha Elia. Mbreti nuk u orvat ta vriste Elian. Në të kundërt, ai po zbatonte urdhrat e profetit. Pse? Sepse Perëndia është Zoti mbi gjithçka. Ai është Perëndia i vetëm që ekziston. Ai shfrytëzon edhe njerëzit e këqij për të vënë në jetë planet e Tija!

## **Piktura 2-2**

### *Gara në Malin Karmel*

I vetëm Elia iu ngjiti malit përpjetë. Përpjetë malit iu ngjitën edhe mijëra Izraelitë. Malit iu ngjitën edhe profetët e perëndive të rreme –me qindra. Malit iu ngjiti edhe Mbreti Ashab. Ç’do ndodhte atë ditë në Malin Karmel? Do të zhvillohej një garë për të mësuar se kush ishte Perëndia i vërtetë - Baali apo Perëndia i Elias.

Elia qëndroi para popullit pa iu trembur syri. Dhe zëri i tij ushtoi: “Deri kur do të lëkundeni mes dy mendimeve? Në qoftë se Zoti është Perëndia, shkoni pas tij; por në qoftë se është Baali, atëherë ndiqni atë.” Askush nuk pipëtiu. Ndoshta nga që e dinin që kishin hequr dorë nga Perëndia për të ndjekur Baalin dhe për këtë veprim ata s’kishin asnjë shfajësim. Perëndia i thotë secilit sot këtu: “Në qoftë se Zoti është Perëndia, shkoni pas tij.” Ai është Perëndia i vetëm i gjallë. Perëndia është Zoti mbi gjithçka. Ai duhet të jetë i pari në jetën tuaj. Jetoni për vete dhe jo për Perëndinë? Nuk doni ta ndani çokollatën me shokun tuaj. Varni turinjtë kur nëna s’ju lë të bëni atë që doni. Grindeni kur është ora e gjumit. Doni të rri natën vonë. Jeni njeri që keni “vetveten” mbi gjithçka. Kjo është mosbindje ndaj Perëndisë. Është mëkat, sepse urdhërimi i Tij është, që Ai të jetë i parë në jetën tuaj. Ti po vepron si një i marrë. Zoti është Perëndia. Ndiqe atë. Ç’do të thotë të ndjekësh Perëndinë? Së pari, do të thotë se ti rregullohesh në sy të Tij - pastrohesh nga të gjitha mëkatet. Jezus Krishti mund t’ju rregullojë në sy të Perëndisë, sepse “Krishti u shfaq për të larguar mëkatet me anë të flijimit



të vetvetes.” (Hebrenjve 9:26) Të ndjekësh Perëndinë nënkupton largimin nga gjërat që nuk i pëlqejnë Perëndisë, mbështetjen tek Ai për t’u rregulluar në sytë e Perëndisë. Dhe pastaj me ndihmën e Perëndisë ti orvatesh të jetosh çdo ditë në mënyrën që i pëlqen Atij. Që nga ajo kohë, Perëndia është i parë në jetën tënde. Perëndia thotë: “Në qoftë se Zoti është Perëndia, shkoni pas tij.” A je njëlloj si ata? Edhe ti nuk nxjerr fjalë nga goja. Je gjithë turp si ata, sepse s’ke ndjekur Perëndinë.

Elia vazhdoi të fliste: “Kam mbetur vetëm unë nga profetët e Zotit, ndërsa profetët e Baalit janë katërqind e pesëdhjetë.” S’dukej si garë e barabartë, apo jo? Ku qëndron ndryshimi? (*Lejoni fëmijët të përgjigjen.*) Po, Perëndia ishte me Elian. Kjo ishte më mirë se të kishe një mijë vetë! E re dhe i ri i krishterë, mos harro se herës tjetër do të dukesh i vetëm në familje apo klasë, që i bindesh Perëndisë. Perëndia i vetëm e i vërtetë është me ty dhe kjo është gjëja më e mirë. A mund të sjellësh raste kur kjo mund të të ndihmojë? (*Lejoni fëmijët të përgjigjen.*) Më poshtë jepen shembuj që ju mund t’i përdorni:

Një dramë që interpretohet nga klasa ka gjuhë vulgare. Ti nuk do t’i shqiptosh këto fjalë. Të tjerët nuk e çajnë kokën. Ti shkon t’i thuash mësuesit që të mos i shqiptosh ato fjalë.

Vëllezërit duan që ti të bashkohesh me ta, në lojën të tallen me fqinjën plakë. Ti je më i riu dhe e ke të vështirë të thuash jo. Nëse je i krishterë, Perëndia i vetëm e i vërtetë do të jetë me ty, ashtu sikundër ishte me Elian.

Profeti i Perëndisë tani po jepte udhëzime. “Merrni një dem, copëtojeni dhe vëreni mbi drutë pa i ndezur ato.” “Unë do të bëj gati demin tjetër. Do ta vë mbi dru pa i ndezur ato.” “Ju do t’i bëni thirrje Perëndisë suaj dhe unë do të thërres Zotin; Perëndia që do të përgjigjet me anë të zjarrit është Perëndia.” Tërë populli u përgjigj dhe tha: “E the bukur!” Le të veprojmë kështu.

### **Piktura 2-3**

Profetët e Baalit morën një dem dhe e bënë gati. Mbretëronte një situatë emocionuese. Ata filluan t’i kërkoni Baalit: “O Baal, na u përgjigj! O Baal na u përgjigj!” Por asgjë nuk ndodhi. Ata vrapuan rreth altarit,

madje edhe kërcyen rreth tij, duke prerë veten me thika. Ata bërtitën dhe ulërinë: “O Baal, na u përgjigj! O Baal na u përgjigj!” Por asnjëri nuk u përgjigj dhe zjarr nuk pati! Kjo vazhdoi gjithë mëngjesin. Elia filloi të tallej me ta: “Ulëri më fort! Ndoshta është duke biseduar ose është në udhëtim. Ndoshta ka rënë në gjumë dhe duhet zgjuar.” Profetët e Baalit filluan të ulërijnë më fort, duke prerë veten. Në mbrëmje ende s’kishte përgjigje. Pse? Baali ishte një Perëndi i bërë nga guri. Ai nuk ishte Perëndi i gjallë. Ai s’dëgjonte. Është mirë të kujtojmë se Perëndia për të cilin lexojmë në Bibël është Perëndia i vetëm i vërtetë. Mund të dëgjoni apo të lexoni në shkollë rreth këtyre perëndive. Por mos harroni, Perëndia thotë: “përveç meje nuk ka Perëndi.” (Isaia 44:6) Kjo është edhe arsyeja pse s’kishte zjarr.

### **Piktura 2-4**

Në mbrëmje Elia tha: “Afrohuni pranë meje.” Të gjithë u afruan sa mundën. Me dymbëdhjetë gurë ai ndërtoi altarin e Zotit që ishte prishur dhe rreth tij hapi një gropë. Pastaj vendosi drutë në rregull, copëtoi demin dhe e vendosi atë mbi dru. “Mbushni enët me ujë dhe derdhini mbi olokaustin dhe mbi drutë,” i tha ai popullit. Kur mbaruan këtë, ai tha: “Bëjeni një herë të dytë.” Dhe pastaj tha: “Bëjeni për të tretën herë.” Uji rridhte rreth altarit dhe mbushte gropën me ujë.

### **Piktura 2-5**

Elia doli përpara dhe u lut: “O Zot, Perëndia i Abrahamit, i Isakut dhe i Izraelit, vepro në mënyrë të tillë që të dihet se ti je Perëndi në Izrael, që unë jam shërbëtori yt që i bëra tërë këto gjëra me urdhrin tënd. Përgjigjmu, o Zot, përgjigjmu, që ky popull të pranojë që ti, o Zot, je Perëndia, dhe ke bërë të kthehen te ti zemrat e tyre.”

Sa kaq, ra zjarri i Zotit mbi altar. Zjarri dogji olokaustin, drutë dhe gurët. Zjarri ishte kaq i nxehtë sa thau edhe ujin që ishte në gropë!

Para kësaj pamje tërë populli u shtri me fytyrën për tokë dhe tha: “Zoti është Perëndia! Zoti është Perëndia!” Ata s’mund të thoshin gjë tjetër! Perëndia e kishte fituar garën e madhe. Ai kishte treguar se vetëm Ai është Perëndi. Ai është i vetmi Perëndi i gjallë e i

vërtetë. A ke filluar ta ndjekësh Atë? A e mban mend si fillohet të ndjekësh Atë?

*(Lejoni nxënësit të përsërisin atë që kenin dhënë më sipër.)*

Ti duhet t'i besosh Jezus Krishtin, Birin e Perëndisë, që vdiq për mëkatet, për të të rregulluar ty në sytë e Perëndisë. Atëherë ti fillon të jetosh në një mënyrë që i pëlqen Perëndisë. Perëndia të ndihmon që ta bësh këtë. Ai të ndihmon që t'i bindesh. Perëndia do që ta ndjekësh Atë qysh sot. Nëse nuk je i sigurt si ta ndjekësh Atë, eja të bisedosh me mua pas mësimit. Unë do të isha i gëzuar të të tregoja nga Bibla si mund të rregullohesh me Perëndinë dhe si mund të fillosh ta ndjekësh Atë. Ka rëndësi që ti ta ndjekësh Atë, ashtu siç ishte e rëndësishme edhe për Izraelitët.

Elia i tha popullit: "Zini profetët e Baalit, mos lini t'ju ikë as edhe një!" Populli i kapi dhe Elia i vrau ata.

Elia iu kthye Mbretit Ashab dhe i tha: "Ngjitu, ha dhe pi, sepse dëgjohej që tani zhurma e një shiu të madh."

## **Piktura 2-6 Elia lutet për shi.**

Profeti i Perëndisë u ngjiti në majë të malit Karmeli, u përkul deri në tokë dhe vuri fytyrën midis gjunjëve. Ai po lutej. Dhe pastaj i tha shërbëtorit të tij: "Ngjitu dhe shiko nga ana e detit!" Shërbëtori u ngjiti dhe pa nga Deti.

"Nuk ka asgjë," tha ai. Elia i tha: "Kthehu të shikosh shtatë herë."

Herën e shtatë shërbëtori tha: "Është një re e vogël, e madhe si pëllëmba e dorës që ngjitet nga deti."

Elia e urdhëroi: "Shko dhe thuaj Ashabit: 'Lidhi kuajt në qerre dhe zbrit para se të të zërë shiu.' " Para se të kthehej shërbëtori, qielli u errësua, filloi era dhe një shi i madh. Kush e solli atë? Perëndia! Perëndia i vetëm e i vërtetë që është zot mbi gjithçka. Asgjë nuk është jashtë kontrollit të tij. Nuk ka tjetër Perëndi të gjallë e të vërtetë. I ri dhe e re e krishterë, mbajeni mend këtë gjë. Vetëm Ai është Perëndia, kështu ti duhet t'i bindesh Atij. Kur ndodhesh i vetëm, mos harroni se Ai është me ty dhe kjo është më mirë se të kesh gjithë mbështetjen e klasës.

E di që nuk je i krishterë? Elia i tha popullit: "Sa kohë ju duhet para se të mbushni mendjen?" Perëndia nuk do që ju të prisni. Ai do që tani e tutje ti ta ndjekësh atë. A je i gatshëm të heqësh dorë nga mëkatet që nuk e kënaqin Atë? A do të mbështetesh te Jezus Krishti për t'u pastruar para Perëndisë? Ashtu ulur, mund t'i thuash heshturazi në shpirtin tënd: "Zoti Jezus, unë jam i keq, jam mëkatar. Më fal. Faleminderit për ndëshkimin që ke marrë për mëkatet e mi. Të lutem më hiq mëkatet e më bëj të pastër para Perëndisë. Tani e tutje unë dua të shkoj pas Tij."

## **Pyetje Përsëritëse për Mësimin 2**

1. Në cilin qytet e dërgoi Perëndia Elian për t'u fshehur nga Ashabi dhe Jezebeli?

*(Në Sareptas.)*

2. Cili është emri i perëndisë së rreme që adhurohej nga shumë Izraelitë?

*(Baal.)*

3. Pse duhet të besojmë e t'i bindemi Perëndisë që flet Bibla?

*(Sepse Ai është Perëndia i vetëm i vërtetë.)*

4. Në ç'mal, Elia u vu ballë për ballë me profetët e rremë, duke ofruar blatimin?

*(Në Malin Karmel.)*

5. Ç'i tha Elia popullit të bënte nëse ata e kuptonin se Zoti ishte Perëndia i vetëm i vërtetë?

*(I tha popullit që të shkante pas Perëndisë.)*

6. Sa profetë të rremë duhet të përballonte Elia në Malin Karmel?  
(850.)
7. Kush është me ne për të na ndihmuar kur bëjmë atë që Bibla thotë se është e drejtë?  
(Perëndia.)
8. Ç'duhet të bëjmë që të fillojmë së ndjekuri Perëndinë?  
(Të heqim dorë nga mëkati e të besojmë Krishtin.)
9. Si u shfaq Perëndia në Malin Karmel se ishte Perëndia i vetëm i gjallë?  
(Ai dogji olokaustin, madje edhe altarin e Elias.)
10. Sa herë duhej të shikonte shërbëtori nga deti para se të shihte përgjigjen e Perëndisë ndaj lutjes së Elias për shi?  
(Shtatë herë.)

# MËSIMI TRE

## ELIA IKËN LARG JEZEBELIT

<b>Shkrimi i Shenjtë:</b>	1 Mbretërve 19:1-21
<b>E vërteta Qendrore:</b>	Perëndia është i duruar.
<b>Zbatimi:</b>	Për fëmijët e <b>pashpëtuar</b> : Kthehu te Perëndia. Ai po të pret. Për fëmijët e <b>shpëtuar</b> : Mendoni durimin e Tij, kërkojini t'ju ndihmojë të jeni të duruar me të tjerët.
<b>PLANI I MËSIMIT</b>	
<b>Fillimi:</b>	“Si i krishterë, a e përjeton ndjenjën e heqjes dorë?”
<b>Zhvillimi e ngjarjeve:</b>	Elia largohet. VQ Shtrihet poshtë një peme dhe lutet të vdesë. Vjen një engjell: “Çohu dhe ha.” Elia ha, fle dhe ha sërish. VQSH Elia shkon në malin Horeb. Perëndia pyet: “Ç'bën këtu?” Elia përgjigjet: “Jam i vetmi profet që kam mbetur.” “Perëndia i thotë: “Dil dhe ndalu mbi malin përpara Zotit.” VQSH Erë, tërmet, zjarr
<b>Pika kulmore:</b>	Një zë i qetë, i ulët. Perëndia i flet Elias. VQP “Kthehu, ti nuk je profeti i vetëm.” VQSH
<b>Përfundimi:</b>	Elia zbaton udhëzimet e Perëndisë. VQSH + P
<b>Vargu që do mbajtur mend:</b>	“Zoti është i dhembshur dhe mëshirëplotë, i ngadalshëm zemërim dhe i madh në mirësi.” (Psalmet 145:8)

## MËSIMI

këtë orë do të kesh vdekur!” Mbreti Ashab i kishte treguar asaj

### Piktura 3-1

*Jezebel kërcënon të vrasë Elian.*

Si i krishterë, a e ke përjetuar ndonjëherë ndjenjën e tërheqjes? Ndoshta, i keni thënë Perëndisë: “Zot, nuk mund të vazhdoj më. Ai po ma bën jetën kaq të vështirë, thjesht sepse jam i krishterë. Nuk ia vlen të dëshmosh për Ty.” Gratë e burrat e mëdhenj të Perëndisë kanë pasur momente dekurajuese. Edhe Elia ishte i dekurajuar kur Mbretëresha Jezebel (3) dërgoi shërbëtorin e saj me një mesazh të tmerrshëm “Nesër në

gjithçka që kishte ndodhur në Malin Karmel. Ajo ishte shumë, shumë e zemëruar dhe e vendosur për të vrarë Elian. Jezebel nuk e dinte se nuk e dëmtonte dot kurrë Elian në qoftë se Perëndia nuk e lejonte. Edhe Elia dukej se e kishte harruar këtë fakt. Ai sa mori mesazhin u frikësua dhe iku për të shpëtuar kokën.

### Piktura 3-2

Ai u largua me ngut nga qyteti dhe shkoi në jug, në tokën që i përkiste Judës.

Por ende i frikësuar se mos e kapnin vazhdoi të ecte drejt shkretëtirës. Aty ndali. S'bënte dot asnjë hap më tej. Ishte shumë i lodhur. Gara në Malin Karmel dhe udhëtimi i gjatë i kishin marrë një pjesë të mirë të fuqive të tij. Ai ishte tepër, tepër i shkurajuar. Ai kishte shpresuar se populli do të kthehej sërish te Perëndia Zot. Po a bëhej kjo e mundur nën sundimin e Mbretëreshës Jezebel? Çdo gjë që kishte bërë i dukej e padobishme. I varfri Elia u ul poshtë një gjineshtre. Ai ndjehej kaq i vetmuar, i shkurajuar dhe i lodhur sa jeta i dukej pa dobi. Dhe ai u lut: "O Zot! Më merr jetën time."

### **Piktura 3-3**

Ç'do bënte Perëndia me Elian? A do t'i thoshte: "Elia, ti nuk je më shërbëtori im, sepse u largove nga Jezebel"? Jo! Perëndia e kuptoi sa i lodhur dhe i shkurajuar që ishte Elia. Ai ishte i duruar me Elian. Ç'do të thotë "i duruar"? Do të thotë se edhe pse Perëndia kishte të drejtë të zemërohej me Elian, Ai nuk u zemërua. Në të kundërt, Ai vazhdonte të ishte dashamirës me të. Në klasë mund të keni ndonjë nxënës që nuk është i mirë në matematikë. Ti e ndihmon atë, por ai vazhdon të vijë e të bëjë pyetje. Nëse jeni i duruar, ç'duhet të bëni? Po, të vazhdoni ta ndihmoni. Nëse nuk jeni i duruar, ç'duhet të bëni? Do t'i thoni: "Ik, largohu, s'kam për të të ndihmuar më." Mos harroni, Perëndia është i duruar. Bibla na thotë se Ai është "Perëndia i durimit" (Romakëve 15:5). Kjo është pse nuk e braktisi shërbëtorin e Tij Elia, edhe pse ai hoqi dorë dhe u largua.

### **Piktura 3-4**

#### *Një engjëll përgatit ushqim për Elian*

Tek rrinte poshtë gjineshtres, Elian e zuri gjumi. Perëndia vazhdonte përkujdesjen ndaj tij. Ai dërgoi një engjëll, i cili preku profetin e fjetur. "Çohu dhe ha," tha engjëlli.

Elia u zgjua dhe vështroi përreth. Pranë kokës së tij pa një kulaç të pjekur mbi gurë të nxehtë dhe një enë me ujë. Elia hëngri me qejf, sepse ishte i uritur dhe i etur nga udhëtimi i gjatë. Pasi hëngri, u shtri dhe ra të flinte përsëri! Pak më vonë, engjëlli i Zotit e

zgjoi atë sërish dhe i tha të hante përsëri. Sa i dashur dhe i kujdesur që ishte Perëndia me shërbëtorin e tij. Ai nuk i tha Elias: "Ç'marrëzi bëre që ike nga Jezebel. Unë nuk jam i kënaqur me ty." Ai mund t'ia thoshte atë, por nuk ia tha. Në të kundërt, me dashuri Ai po i jepte Elias atë që kishte nevojë - pushim e ushqim. Perëndia është i tillë me të gjithë fëmijët e Tij. Nëse je i krishterë, mos harro se Perëndia nuk të lë kurrë kur je në të keq. Kur nuk e kënaq Atë dhe nxelesh me vëllanë tënd. Ai nuk thotë: "S'kam më punë me ty." Ai punon në jetën tënde, që ti të shëmbëllesh gjithmonë e më shumë me Jezus Krishtin. Mund të dojë shumë kohë, por Ai nuk heq dorë kurrë. Ai nuk do të hiqte dorë edhe nga Elia!

### **Piktura 3-5 Elia në Malin Horeb.**

Profeti ndjehej më mirë pasi hëngri e piu. Ai duhej të kishte pyetur Perëndinë se ç'duhej të bënte më pastaj, por nuk e pyeti. Ai udhëtoi drejt jugut për dyzet ditë e dyzet netë. Ai po shkonte drejt Malit Horeb, ku një ditë Perëndia kishte folur me Moisiun për t'i dhënë atij dhjetë urdhërimet dhe planin e tabernakullit. Elia kishte nevojë që t'i fliste Perëndia. Më në fund, arriti në Malin Horeb, mali i Perëndisë. Ai u fut në një shpellë për të kaluar natën. Dhe atëherë fjala e Zotit iu drejtua dhe i tha: "Ç'bën këtu Elia?"

"Kam punuar shumë për Zotin, Perëndinë e Plotfuqishëm. Populli i Izraelit është larguar nga Perëndia dhe ka vvarë profetët e Tij. Kam mbetur vetëm unë," iu përgjigj Elia.

Dhe Perëndia i tha: "Dil dhe ndalu mbi malin përpara Zotit." Edhe një herë Perëndia ishte i duruar me Elian. Madje, Ai s'përmendi fare gabimet e Elias. Ai do t'i tregonte Elias diçka nga Vetja. Për këtë kishte nevojë profeti, sepse po mendonte së tepërmi për problemet e tija. Jam shumë i gëzuar që Perëndia është i dashur, i arsyeshëm dhe i duruar. Ai nuk ndalon punën me fëmijët e Tij. Ai nuk është i paduruar. Të rinj dhe të reja të krishterë, mos harroni të falënderoni Perëndinë për këtë cilësi. Ndoshta, keni ardhur për t'i treguar Atij pendimin për mëkatet e bëra. Me po këtë mëkat mund të vini sërish. Dhe Ai nuk ju thotë: "Kjo është hera e fundit që do t'ju fal."

Bibla thotë se Ai është "i ngadalshëm në zemërim dhe i madh në mirësi." (Psalmet

103:8) Pse nuk e falënderoni Atë për durimin e tij? Ky ishte Perëndia që foli me Elian.

Kështu, Elia mbuloi fytyrën me mantelin, duke qëndruar mbi mal. Një erë e fortë dhe e furishme çante malet dhe thyente shkëmbinjtë përpara Zotit, por Zoti nuk ishte në erë. Mbas erës ra një tërmet, por Zoti nuk ishte në tërmet. Mbas tërmetit ra një zjarr, por Zoti nuk ishte edhe në zjarr. Si mund ta tregonte Perëndia Vetën para Elias? Pas erës, tërmetit dhe zjarrit, Elia dëgjoi një zë të ulët e të qetë. Elia e dinte se ishte Perëndia që po fliste me Të - butësisht e ëmbëlsisht. Perëndia pyeti: "Ç'bën aty?" Elia kishte shkuar pa e pyetur Perëndinë nëse duhej të shkonte atje. Edhe pse ai kishte ikur nga Mbretëresha Jezebel, Perëndia ishte i dashur dhe i butë me të. Sa i durueshëm që është Ai! Bibla thotë: "Zoti nuk do që ndokush të humbasë." (2 Pjetër 3:9) Perëndia është i durueshëm me këdo, jo vetëm me fëmijët e Tij. Nëse nuk je i krishterë, Perëndia është i durueshëm edhe me ty. A ke gënjyer këtë javë? Të Martën në mëngjes the: "Nënë, më dhemb koka." Dhe nëna mendoi që do të ishte më mirë që ti të mos shkoje në shkollë. Dhe ty s'të dhembte koka fare. Ti u hoqe me dhimbje koke, duke gënjyer. Ky është mëkat, sepse Perëndia urdhëron: "Nuk duhet të bësh dëshmi të rreme." (Eksodi 20:16) Dhe Perëndia nuk të ndëshkoi aty për aty. Pse jo? Sepse është i duruar? Shpesh ti nuk i bindesh Atij, dhe Ai nuk të ndëshkon menjëherë. Kjo nuk do të thotë që s'ke për t'u ndëshkuar kurrë. Ai pret që ti të largohesh nga mëkati, t'i besosh Zotit Jezus Krisht që të të falë. Nëse vepron ndryshe, Ai do të të ndëshkojë përgjithmonë. Deri tani Ai ka qenë shumë i duruar me ty. Po, Ai është i duruar me të gjithë njerëzit. Ai ishte i duruar edhe me Elian kur e pyeti: "Pse je këtu?" Elia i dha të njëjtën përgjigje që kishte dhënë më parë, duke shpjeguar se Izraelitët kishin vrarë profetët e Perëndisë dhe ai ishte profeti i vetëm që kishte mbetur.

Zoti i tha atij: "Shko, merr përsëri rrugën e kthimit." Perëndia i tha Elias të bënte disa gjëra të rëndësishme kur të kthehej. Të zgjidhte një mbret tjetër për Izraelin në vend të Ashabit. Të thërriste një njeri të ri të zinte vendin e Elias si profet i Perëndisë. Dhe pastaj Zoti i tha Elias diçka të mrekullueshme. Ai i tha atij se në Izrael kishte shtatë mijë vetë që ishin besnikë ndaj Perëndisë, njerëz që nuk adhuronin Baalin. Ç'lajme të

mrekullueshme për Elian? Ai kishte menduar se ishte i vetëm, kurse tani Perëndia po e inkurajonte atë. Perëndia me të vërtetë i dha atij zemër. I ri dhe e reja e krishterë, kur je i vrarë shpirtërisht, mos mendo se Perëndia është kundër jush. Tregoji Atij pse ndjehesh i vrarë. Mos mendo se Ai do të të braktisë. Ai nuk të braktis, sepse Ai është shumë i duruar me fëmijët e Tij. Meqenëse ai është i duruar me ty, edhe ti duhet të jesh i duruar me të tjerët.

Ti je duke bërë një piknik dhe babai të thotë ty dhe vëllait të vogël të ngjitesh në kodrën që ndodhet pranë. Ti nisesh menjëherë, por vëllai yt është dy vjet më i vogël dhe s'mund të ngjitet po aq shpejt sa të ngjitesh ti. Ç'duhet të bësh nëse je i duruar me të? (*Lejoni fëmijët të përgjigjen.*)

Ndoshta, klasa është ndarë në dy skuadra për të luajtur beisboll. (*Ose ndoshta një lojë tjetër që e njohin fëmijët.*) Një vajzë nuk e godet topin se nuk sheh mirë nga sytë. Kur ajo është në skuadrën tënde, si do ta shprehësh durimin tënd ndaj saj? (*Lejoni fëmijët të përgjigjen.*)

Do të ishte e vështirë, madje e pamundur për ne, në qoftë se Perëndia nuk do të ishte i duruar me fëmijët e Tij. Nëse je i krishterë, kërkoji Perëndisë të të ndihmojë të jesh i duruar me të tjerët, ashtu sikundër Ai është i duruar me ty. Sigurisht, që Elia ishte i gëzuar që Perëndia e trajtoi atë kaq mirë.

## **Piktura 3-6**

### *Thirrja e Perëndisë për Eliseun.*

Me mençuri Elia bëri gjithçka që i kishte thënë Perëndia. Elia mori rrugën e kthimit. Ai gjeti njeriun, që një ditë do të zinte vendin e tij. Ai po lëronte tokën me qe. Emri i tij ishte Eliseu. Elia i kaloi afër dhe i hodhi sipër mantelin e tij. Eliseu e kuptoi menjëherë përmbajtjen e këtij veprimi. Ai e dinte se Perëndia po e thërriste të punonte për Të. Pasi i la lamtumirën nënës dhe babait, Eliseu shkoi me Elian. Për një kohë, ai ishte shërbëtori i njeriut të Perëndisë. Ai nuk do ta zëvendësonte Elian menjëherë, sepse Perëndia i kishte ngarkuar atij edhe disa detyra të tjera të rëndësishme. Edhe pse Elia ishte larguar, Perëndia e ktheu atë dhe po e lejonte të punonte sërish për Të. Sa i duruar që është Perëndia! I ri dhe e re e krishterë, ngadalë por me siguri Perëndia do t'ju bëjë

juve që t'i shëmbëllemi Jezus Krishtit. Ai nuk do t'ju braktisë as kur të bëni marrëzira, as kur të mëkatoni, madje as kur të jeni në gjendje jo të mirë shpirtërore. A nuk do të thoni nga zemra: "Faleminderit Perëndi që je kaq i duruar me mua."

Ti s'i ke besuar kurrë Jezus Krishtit si Shpëtimtarit tënd. Perëndia ka qenë i duruar me ty. E di që ke mëkatuar. Ai nuk të ndëshkon menjëherë. Ai ka folur me ty. Ka pasur momente kur ti ndjeje se realisht duhet

t'i besojë Zotit Jezus, por nuk e bërë këtë. Edhe tani Perëndia po të flet sërish. Besoji Jezus Krishtit tani. Durimi i Tij nuk është pa fund, nëse ti vazhdon rrugën tënde mëkatore. Kthehu tek Perëndia qysh tani dhe atje ku je ulur foli atij me shpirt: "Zot, faleminderit që ke qenë i duruar me mua kur nuk u jam bindur. Ti kërkoj falje që kam qenë kaq i pabindur. Faleminderit që fola sërish me mua. Jam i gëzuar që Zoti Jezus vdiq për mua dhe tani e besoj Atë të më heqë nga vetja mëkatet e mia."

## Pyetje Përsëritëse për Mësimin Tre

1. Cila Mbretëreshë e keqe kërcënonte jetën e Elias?  
(*Mbretëresha Jezebel.*)
2. Ç'bëri Perëndia për Elian kur iku në shkretëtirë dhe ishte tepër i shkrajuar?  
(*Perëndia u kujdes për të. Ai dërgoi një engjell t'i jepte atij ushqim, ujë e prehje.*)
3. Në ç'vend në Bibël gjejmë fjalët: "Zoti është i dhembshur dhe mëshirëplotë, i ngadalshëm në zemërim dhe i madh në mirësi."  
(*Psalmet 145:8.*)
4. Sa ditë iu deshën Elias të arrinte në Malin Horeb pasi pushoi poshtë një gjineshtre?  
(*40 ditë.*)
5. Si i tregoi Perëndia Elias në hyrje të shpellës se Ai ishte i gjithëpushtetshëm dhe se ishte në kontroll të universit?  
(*Nëpërmjet erës, tërmetit dhe zjarrit të fuqishëm.*)
6. Ç'i tha Perëndia Elias me zërin e tij të qetë e të ulët?  
(*Ç'po bën këtu? Merr rrugën nga ke ardhur.*)
7. Përmendni dy nga detyrat që Perëndia i kishte ngarkuar Elias të bënte kur të kthehej?  
(*Të zgjidhte një mbret tjetër në vend të Ashabit dhe një të ri që do të zëvendësonte Elian si profet.*)
8. Elia mendonte se ishte i vetën në ndjekjen e Perëndisë së vërtetë e të gjallë. Si e inkurajoi atë Perëndia?  
(*Duke i thënë se kishte edhe 7000 vetë që ishin besnik ndaj Perëndisë.*)
9. Ç'duhet të kujtoni kur jeni të shkrajuar (dekurajuar) si i krishterë?  
(*Se Perëndia është i duruar me secilin nga ne.*)
10. Nëse Perëndia është i duruar me ne, cili do të jetë qëndrimi ynë ndaj njerëzve që kanë probleme?  
(*Ne duhet të jemi të durueshëm me ta.*)

# MËSIMI KATËR

## ELIA DHE VRESHTI I NABOTHIT

<b>Shkrimi i Shenjtë:</b>	1 Mbretërve 21:1-26
<b>E Vërteta Qendrore:</b>	Perëndia është i drejtë.
<b>Zbatim:</b>	Për fëmijët e <b>pashpëtuar</b> : Perëndia do t'ju ndëshkojë për mëkatet tuaja nëse nuk besoni Krishtin si Zotin dhe Shpëtimtarin tuaj? Për fëmijët e <b>shpëtuar</b> : Kur keqtrajtoheni, lini Perëndinë ta zgjidhë.
<b>PLANI I MËSIMIT;</b>	
<b>Fillimi:</b>	“A është çdo njeri i ndershëm?” VQ
<b>Zhvillimi e ngjarjeve:</b>	Mbreti Ashab lakmon vreshtin e Nabothit. VQP Ai i kërkon Nabothit vreshtin. Nabothi refuzon shitjen ose këmbimin. Mbreti Ashab zemërohet. Ndërhyn Jezebel. VQP Nabothi “gjykohet”. Nabothi vritet. VQSH Mbreti Ashab shkon të marrë vreshtin. Mbreti Ashab takon Elian.
<b>Pika kulmore:</b>	“Ku vdiq Nabothi, do të vdesësh edhe ti”. Elia VQP
<b>Përfundimi:</b>	Mbreti Ashab vdes në betejë. Mbretëresha Jezebel vdes. VQP + SH
<b>Vargu që do mbajtur mend:</b>	Përsërisni vargun e javës së shkuar. Nëse mësimin e jepni veçmas, propozojmë vargun e mëposhtëm: “ <i>Është një Perëndi që nuk e njeh padrejtësinë; ai është i dhe i mirë.</i> ” Ligji i Përtërirë 32:4

## MËSIMI

“A është çdo njeri i ndershëm?” mërmëriti Alani duke shkëlmuar një gur me këmbë një të Premte pasdite. Gjatë gjithë javës ishte mbajtur në shkollë mbas mësimin, sepse disa djem të klasës së tij ishin kapur duke gjuajtur makinat me gurë. Ai kishte qenë i pranishëm dhe kishte hedhur vetëm një gur. Në të vërtetë, ai po priste një shok që ishte futur në një dyqan. “Dhe ti pret që unë të besoj ato që thua ti?” kishte pyetur mësuesja. Kur ai shpjegoi gjithçka, mësuesja nuk e besoi. Dhe pa kurrfarë habije, Alani mërmëriti: “A është çdo njeri i ndershëm?” Mësuesit bëjnë

gabime të tilla, sikundër gabojnë edhe nënat dhe baballarët. Vetëm njëri nuk gabon dhe Ai është Perëndia. Bibla na thotë se Perëndia është i drejtë. Ai është i ndershëm në gjithçka që bën. Ai s'gabon kurrë. Ai s'është kurrë i keq. Kur ndëshkon mëkatin, Ai jep ndëshkimin që është i merituar. Bibla thotë: “Ai është i drejtë dhe i mirë.” Ligji i Përtërirë 32:4

**Piktura 4-1** Mbreti Ashab kërkon vreshtin e Nabothit.



Mbreti i keq Ashab se kuptonte këtë gjë, ndryshe s'do kishte lejuar gjërat e tmerrshme që ndodhën që ne i dëgjojmë nëpërmjet mësimit të sotëm Biblik.

Çdo gjë filloi me diçka që mbreti e donte pa masë! Mbreti kishte një pallat të bukur në Samari. Pranë pallatit jetonte një njeri me emrin Naboth. Nabothi kishte një vresht ku rritej rrush kokërrmadh, me ngjyrë të kuqe e gjithë lëng. Nabothi e donte vreshtin e tij. Ndoshta, që në fëmijëri ai kishte ndihmuar të atin të kujdesej për vreshtin, sepse vreshti ishte pronë të atit, madje e gjyshit të tij.

Kur Mbreti Ashab e pa vreshtin kaq afër me pallatin, ai e donte atë ta kishte pronën e vet! Mbreti ishte i pasur. Ai kishte gjithçka që i nevojitej, madje me shumicë. Por ai donte edhe vreshtin. Kur do diçka që i takon dikujt tjetër, ky quhet "lakmi". Urdhri i Perëndisë është: "Nuk duhet të keni zili." (Eksodi 20:17) A e ke shkelur këtë urdhër?

Ndoshta, komshiu yt kalon duke ngarë një makinë BMW. Dhe ti mendon: "Do të dëshiroja ta kisha një makinë të tillë. E pse të mos kem edhe unë një makinë të tillë? Dhe rri e mendon për të. Madje, ke zili edhe biçikletën e tij.

Ose në klasë ke një vajzë që vesh rroba të bukura të modës. Ti ke zili. Do që edhe ti të vishesh si ajo. I thua nënës sa qejf i ke ato lloj rroba. Ti lakmon rrobat e saj.

A ka rëndësi kjo gjë? Po. Ti ke shkelur urdhrin e Perëndisë. Ç'thotë Perëndia, Gjykatësi i ndershëm, rreth ndëshkimit të shkeljes së Ligjit të Tij? "Shpirti që mëkaton ka për të vdekur." (Ezekiel 18:4) Kjo nënkupton që gjithë mëkatet, përfshirë edhe lakminë, duhen dënuar me vdekje. "Me vdekje" nënkupton shpëputjen nga Perëndia dhe dënimin e përjetshëm. Ky është dënimi që meritojmë ti dhe unë, sepse kemi thyer pa reshtur urdhërimet e Perëndisë. Ne s'mund të themi se kjo nuk është e ndershme. Kjo është ajo që meritojmë. Perëndia është një Gjyqtar i ndershëm.

#### **Piktura 4-2**

Po Mbreti Ashab s'mendonte fare për Perëndinë. Ai mendonte vetëm për vreshtin. Ai vendosi të fliste me Nabothin. "Ma jep vreshtin," i tha ai. "Në këmbim do të të jap një

vresht më të mirë ose, po të të pëlqejë më tepër, barasvlerën në të holla."

Por Nabothi iu përgjigj: "Të më ruajë Zoti të të lë trashëgiminë e etërve të mi!" Perëndia kishte thënë se familja duhet të ruajë tokën e saj. Dhe Nabothi vendosi t'i bindej fjalës së Perëndisë.

#### **Piktura 4-3.**

Mbreti ishte i zemëruar dhe i zhgënjyer. Shkoi në pallat dhe pastaj në dhomën e tij të gjumit. U shtri ktheu kokën mënjanë dhe s'donte të hante. Në dhomë erdhi mbretëresha Jezebel. "Pse e ke frymën kaq të trishtuar dhe nuk ha?" pyeti ajo. Ai iu përgjigj i zemëruar: "Sepse i thashë Nabothit të më shiste vreshtin dhe ai kundërshtoi të ma jepte." "A nuk je ti që mbretëron?" shqiptoi ajo. "Çohu, ha dhe zemra jote të gëzohet. Vreshtin e Nabothit do të ta jap unë!"

#### **Piktura 4-4 Mbretëresha Jezebel i premtion Ashabit vreshtin**

Mbretëresha e keqe filloi nga puna. Ajo shkroi disa letra në emër të Ashabit, i vulosi me vulën e tij dhe ua dërgoi pleqve dhe parisë që banonin në po atë qytet me Nabothin. Ajo i udhëzonte ata të organizonin një gjyq, ku të ishte i pranishëm edhe Nabothi. Ata duhet të gjenin dy dëshmitarë, që të dëshmonin kundër tij, duke thënë: "Nabothi ka blasfemuar Perëndinë dhe Mbretin." Gjyqi ta shpallte Nabothin fajtor dhe ai të vritej me gurë. Jezebel nuk njihte dhe nuk vriste mendjen për Ligjet e Perëndisë. Ajo filloi ta zbatonte planin e saj, dhe gjithçka dukej se po shkonte mirë. Por të mos harrojmë se Perëndia jo gjithmonë të ndëshkon aty për aty. Kjo nuk do të thotë se fajtori shpëton pa u ndëshkuar. Në shkollë ka raste kur nxënësit shpëtojnë pa u ndëshkuar. Ndoshta, sepse mësuesi nuk di ç'kanë bërë ata. Apo mësuesi është në humor të mirë, dhe nuk do të ushtrojë ndëshkimin. Po kjo nuk ngjet kurrë me Perëndinë. Ai i di të gjitha të dhënat. Ai nuk karakterizohet nga humori i mirë apo humori i keq. Perëndia është gjithmonë njësoj. Ai nuk të ndëshkon menjëherë, por ama të ndëshkon me siguri. A nuk mendon seriozisht për këtë çështje? Është marrëzi të bësh të kundërtën, se një ditë Perëndinë do ta takosh si Gjykatësin tënd. Jezebel nuk e dinte këtë, dhe në këtë

drejtim ajo se vrau mendjen fare. Ajo vazhdoi planin e saj të keq për të siguruar vreshtin për Ashabi.

## **Piktura 4–5**

Vdekja e Nabothit.

Pleqtë dhe paria e qytetit vepruan ashtu siç u ishte kërkuar Jezebeli. Ata e nxorën Nabothin para gjyqit. Banorët e qytetit u mblodhën për të parë se ç'po ndodhte. Ata thanë se Nabothi kishte folur keq për Mbretin dhe për Perëndinë. Nabothi nuk u lejua të fliste. Ata e shpallën Nabothin “fajtor”, e nxorën jashtë qytetit dhe e vranë me gurë. Nuk ishte një gjyq i ndershëm. Nabothi, ndjekës i Perëndisë, u trajtua në mënyrë të pandershme nga këta njerëz. Ka raste kur fëmijët e Perëndisë trajtohen në mënyrë të pandershme nga të tjerët dhe vështirë të kuptohet pse Perëndia e lejon këtë. Kjo nuk do të thotë se Perëndia nuk është më i ndershëm e i drejtë. Ai ka arsye pse na lejon të vuajmë padrejtësisht, arsye që i di dhe i kupton vetëm Ai. Por ata që keqtrajtojnë fëmijët e Perëndisë do të ndëshkohen. Dhe fëmijët që kanë vuajtur padrejtësisht do të shpërblehen. Perëndia do të kujdeset që në fund gjithçka të përfundojë mirë. Nëse je i krishterë, ç'duhet të bësh nëse trajtohesh keq nga të tjerët? Fjala vjen disa djem në klasë të rrëmbejnë çantën, të hedhin librat në ujë dhe fillojnë të bërtasin: “Qenke edhe i krishterë, ta tregojmë ne se ç'bëjmë ne me të krishterët!” Cila do të ishte mënyrë më e mirë për të vepruar:

T'i rrahësh me ndihmën e vëllait dhe shokëve të tij.

Ta marrësh çantën pa u vënë re.

T'i kërkuash Perëndisë të zgjidhë problemin, të qëndrosh larg tyre gjatë rrugës për në shtëpi.

*(Lejoni nxënësit të diskutojnë se cila është mënyra më e mirë. Është mirë t'ju thuhet fëmijëve të krishterë se nëse kanë një problem të tillë, ti do të jesh i gëzuar të bisedosh e të lutesh tok me ta. Tregojuni fëmijëve se ku mund t'ju gjejnë pas mësimit.)*

Perëndia nuk do që të keqes t'i përgjigjemi me të keqe. Ai thotë që këtë punë t'ia besojmë Atij. “Mua më përket hakmarrja, unë kam për të shpëguar, thotë Zoti.” (Romakëve

12:19) Ai do t'i shpëguante Jezebelën dhe Ashabin për poshtërsinë e tyre.

## **Piktura 4-6**

Mbreti Ashab takon Elian në vresht.

Ata ishin shumë të gëzuar që kishte vdekur Nabothi. Jezebel i tha Ashabit: “Çohu dhe shtjere në dorë vreshtin e Nabothit.” Menjëherë sa dëgjoji se Nabothi kishte vdekur, Ashabi shkoi të merrte vreshtin për vete. Atje takoi njeriun që s'donte ta shihte me sy! E merrni me mend se cilin? Po, Elian.

Perëndia dinte gjithçka që kishte ndodhur. Ai dërgoi Elian me mesazhin e tij për mbretin. Profeti u fut në vresht. Kur e pa Ashabi i tha: “Më gjete pra, o armiku im?” Dhe Elia iu përgjigj rreptë: “Po të gjeta, sepse je shitur për të bërë atë që është e keqe në sytë e Zotit. Perëndia do të të ndëshkojë për këtë të keqe. Ti do të vdesësh dhe pasardhësit e tu do të vdesin.” Elia i tha se qentë do të hanë Jezebelin e vdekur. Ç'mesazh i frikshëm! Por ishte tamam ajo që meritonte Ashabi dhe Jezebel. Perëndia po tregohej i ndershëm. Ai gjithmonë është i tillë. Ai duhet të ndëshkojë të gjithë mëkatet. Si mund të shkojë çdokush në qiell, nëse Perëndia ndëshkon të gjithë mëkatet? Kësaj pyetje Ai i ka dhënë një zgjidhje të mrekullueshme. Ai dërgoi në botë Birin e Tij të vetëm. Biri i Tij, Jezus Krishti, s'mëkatoi kurrë, kështu Ai nuk meritonte ndëshkim. Megjithatë, Perëndia e ndëshkoi Atë. Perëndia e ndëshkoi Atë për mëkatet që ke bërë ti dhe unë. Kjo do të thotë se nëse i beson Jezus Krishtit që të të shpëtojë nga mëkati, ti e di se mëkati yt është ndëshkuar dhe Perëndia nuk të ndëshkon më. Pra, Perëndia është i drejtë dhe i ndershëm edhe kur fal mëkatin. Ndoshta, ke menduar për atë që meriton nga Perëndia. Ky është për ty një lajm i mirë. Eja te Jezus Krishti, kërkoji të të falë e të jetë Shpëtimtari yt. Kështu do ta dish se gjithë mëkatet e tua janë ndëshkuar dhe ti s'ke frikë të takohesh me Perëndinë. Bibla thotë: “Tani, pra, nuk ka asnjë dënim për ata që janë në Krishtin Jezus.” (Romakëve 8:1) Kjo do të thotë se nuk ka ndëshkim për ata që i përkasin Zotit Jezus. Kjo është e vërtetë se e ka thënë vetë Perëndia. Çdo gjë që thotë Ai është e vërtetë. Ai thotë se nëse nuk i beson Jezus Krishtit, ti ndëshkohesh për jetë. Dhe kjo gjithashtu është e vërtetë. Sikundër ishte mesazhi i tmerrshëm që solli Elia.

Jo shumë kohë pas gjithë këtyre ngjarjeve, mbreti u plagos në një betejë dhe vdiq. Disa vjet më vonë, kur Jezebel po shikonte jashtë nga një dritare e lartë, disa njerëz e hodhën nga dritarja dhe trupin e saj e hëngrën qentë. Po, Perëndia i drejtë ndëshkoi mbretëreshën dhe mbretin e keq. Kur të largoheni sot, ju lutem mos harroni cilësitë e Perëndisë. Ai është i drejtë dhe i ndershëm. Nëse e do Zotin Jezus, mos u orvat t'i përgjigjesh të keqes me të keqe. Lërjani Perëndisë të zgjidhë gjithçka. Nëse e din se nga Perëndia sot meriton vetëm ndëshkim për mëkatet e tua, pse nuk heq dorë nga

mëkatet, besoji Jezus Krishtit si Shpëtimtarit tënd, duke ditur se Ai ka marrë ndëshkimin tënd. Nëse vazhdon në rrugën e mosbindjes, Perëndia do të të ndëshkojë përjetë. Nëse i beson Zotit Jezus të të falë mëkatet e të jetë Shpëtimtari yt, ti s'do ndëshkohesh kurrë. Dhe tani le të përjetojmë disa momente qetësie. Nëse do me të vërtet, fol heshturazi me Zotin Jezus, kërkoji Atij të jetë Shpëtimtari yt, të të shpëtojë nga ndëshkimi që meriton. *(Mësues: krijoni një moment qetësie. Mësimin mbylleni me lutje.)*

### **Pyetje Përsëritëse për Mësimin Katër**

1. Ç'do të thotë se Perëndia është i drejtë?

*(Do të thotë se është i ndershëm dhe se jep ndëshkim dhe shpërblim për njerëzit që e meritojnë.)*

2. Cili ishte njeriu, vreshtin e të cilit e donte Mbreti Ashab?

*(Nabothi.)*

3. Cilin urdhër të Perëndisë po thyente Mbreti Ashab kur donte një gjë që s'ishte e tija?

*(Nuk duhet të lakmoni.)*

4. Ç'duhet të ndodhë me ne kur nuk i bindemi Perëndisë?

*(Meritojmë ndëshkim, ndarje të përjetshme nga Perëndia.)*

5. Ç'bëri Ashabi kur nuk mori atë që deshte?

*(Ai shkoi në dhomën e gjumit, u shtri dhe u ngrys.)*

6. Ç'bëri Jezebel që të merrte vreshtin e Nabothit?

*(Ajo vuri njerëz të shpifnin për të, për ta dënuar me vdekje.)*

7. Pse mendoni që Mbreti i keq nuk donte ta shihte Elian?

*(Sepse ai e dinte që kishte mëkatuar dhe Perëndia e ndëshkon mëkatin.)*

8. Ç'mesazh solli Elia për Ashabin nga Perëndia?

*(Se ai dhe Jezebel do të ndëshkoheshin dhe mënyrën e vdekjes së tyre.)*

9. Si mund të jetë Perëndia i drejtë, duke na falur mëkatet tona?

*(Ai ndëshkoi Birin e Tij në kryq për mëkatet tona.)*

10. Mëkatet e kujt falen?

*(Mëkatet e atyre që besojnë në Zotin Jezus Krisht.)*

# MËSIMI PESË

## ELIA SHKON NË QIELL

<b>Shkrimi i Shenjtë:</b>	2 Mbretërve 2:1-15
<b>E Vërteta Qendrore:</b>	Perëndia është gjatë gjithë kohës me fëmijët e Tij.
<b>Zbatim:</b>	Për fëmijët e <b>pashpëtuar</b> : Bëhuni fëmijë të dhe ky privilegj do të jetë edhe juaji. Për fëmijët e <b>shpëtuar</b> : Mbani mend se nuk jeni kurrë vetëm.
<b>PLANI I MËSIMIT</b>	
<b>Fillimi:</b>	“Cili jam unë?”
<b>Zhvillimi e ngjarjeve:</b>	Elia i afrohet fundit të jetës së tij në tokë. VQ Elia dhe Eliseu shkojnë në Bethel dhe Jeriko. VQSH Ata kalojnë Lumin Jordan. Djemtë e profetëve shikojnë. VQSH Elia e pyet Eliseun nëse ka ndonjë kërkesë. Eliseu kërkon një pjesë të dyfishtë të frymës së tij. Të dy vazhdojnë udhëtimin. Shfaqet qerrja e zjarrtë dhe Elia ikën. VQP Eliseu merr mantelin e Elias.
<b>Pika kulmore:</b>	Eliseu rrahu ujërat dhe tha: “Ku është Zoti, Perëndia Elias?” Ujërat u ndanë. VQSH
<b>Përfundimi:</b>	Djemtë e profetëve takojnë Eliseun. Ata përkulen para tij. VQSH + P
<b>Vargu që do mbajtur mend:</b>	“Nuk do të të lë, nuk do të të braktis.” (Hebrenjve 13:5)

## MËSIMI

Po ju shtroj pyetjen “Cili jam unë?” Të shohim numrin e të dhënave që ju nevojiten!

1. Isha fermer.
2. Lëroja tokën me qe.
3. I dhashë lamtumirën nënës e babës.
4. Isha shërbëtor dhe mik i Elias.
5. Emri im tingëllon i afërt me atë të Elias.

(Mësues: këto të dhëna mund t'i shkruani në letër.)

### Piktura 5-1

*Elia dhe Eliseu udhëtojnë së bashku.*

Perëndia kishte zgjedhur Eliseun të vazhdonte punën e Elias. Që nga ajo ditë kishin kaluar vite të tëra. Pasi Elia (1) i kishte thënë Eliseut të vinte me të, Eliseu e kalonte kohën duke ndihmuar Elian dhe duke mësuar prej tij.

Koha e Elias në tokë thajse kishte mbaruar. Ç'jetë me rreziqe që kishte qenë! Perëndia e kishte shfrytëzuar Elian t'i jepte mbretëreshës dhe mbretit të keq mesazhe që ata nuk dëshironin t'i dëgjonin. Për pasojë, ata e urrenin dhe donin ta vrisnin atë. Vetëm prania dhe kujdesi i Perëndisë e kishin shpëtuar. A mund të kujtoni disa nga momentet kur Perëndia tregoi se ishte me të

dhe kujdesej për të në një mënyrë të mrekullueshme? (*Lejoni fëmijët të bëjnë një përsëritje të shpejtë.*) Perëndia kishte qenë me Elian gjatë gjithë kohës. Perëndia është me fëmijët e Tij gjatë gjithë kohës. Ai është kaq i madh sa gjendet gjithkund. Por Ai qëndron veçanërisht afër me fëmijët e Tij. Është gjë e mrekullueshme që edhe pse në botë ka me mijëra njerëz që janë fëmijët e Tij, Ai gjatë gjithë kohës është afër secilit prej tyre. Në Bibël Ai thotë: “A nuk e mbush unë qiellin dhe tokën?” (Jeremia 23:24) Ai është kaq i madh sa mund të jetë me gjithë fëmijët e Tij, sikundër ishte edhe me Elian.

### Piktura 5-2

Dhe tani që puna e Elias kishte mbaruar, ishte koha që Perëndia ta merrte atë në qiell. Këtë e dinin edhe Elia me Eliseun. Të dy shërbëtorët e Perëndisë po udhëtonin së bashku nga Gilgali, kur Elia i tha Eliseut: “Ndal kështu, të lutem, sepse Zoti më dërgoi deri në Bethel.” Eliseu nuk donte ta linte Elian vetëm. Ai e dinte se do ta ndjente së tepërmi mungesën e tij dhe u përgjigj: “Ashtu siç është e vërtetë që Zoti rron, unë nuk do të të lë.”

Vite më parë Elia kishte hapur shkollë të ndihmonte të rinjtë të mësonin më shumë rreth Perëndisë. Këto ishin quajtur “shkollat e profetëve”. Të rinjtë që studionin në këto shkollë u quajtën “bijtë e profetëve”. Kur Elia dhe Eliseu arritën në Bethel, takuan këta të rinj, të cilët dukej se e dinin se Elia do të shkonte së shpejti në qiell. Ata hoqën Eliseun mënjanë dhe e pyetën: “A e di që Zoti do ta çojë sot Zotin tënd përmbi ty?” Dhe ai u përgjigj: “Po, e di; heshtni!”

### Piktura 5-3

Dhe përsëri Elia i tha Eliseut: “Ndal kështu, të lutem, sepse Zoti më dërgoi deri në Jeriko.” Po Eliseu qëndroi me Zotin e tij. Në Jeriko kishte një shkollë tjetër për profetë. Ata i thanë Eliseut: “A e di që Zoti do ta çojë sot Zotin tënd përmbi ty?” Dhe ai u përgjigj: “Po, e di; heshtni!” Profetët e dinin se do të ndodhte diçka. Ata donin të shihnin se ç’do ndodhte me Elian. Kështu, u ngjitën në një vend të lartë ku i shihnin të dy profetët duke ecur.

Elia i tha Eliseut: “Ndal kështu, të lutem, sepse Zoti më çon në Jordan.” Dhe ai u përgjigj: “Ashtu siç është e vërtetë që Zoti

rron, unë nuk do të të lë.” Eliseu donte të kalonte çdo minutë me Elian, sepse e dinte që ai shumë shpejt s’do ishte më aty. Ky është ndryshimi midis mikut dhe Perëndisë. Një mik, edhe më i ngushti, madje edhe nëna e babai nuk mund të jenë me ju çdo minutë të ditës apo natës. Po është ndryshe me Perëndinë. Shumë kohë më parë, Perëndia i premtoi njerit pre shërbëtorëve të Tij: “Nuk do të të braktis”. (Zanafilla 28:15) Nëse je fëmijë i Perëndisë, Ai është pranë nesh në çdo kohë dhe në çdo vend. Asnjë nga miqtë e tu nuk mund të jetë i tillë. Madje, edhe Elia nuk ishte i tillë. Shpejt, ai do ta lërë Eliseun.

### Piktura 5-4 Lumi Jordan hapet.

Kur Elia dhe Eliseu arritën në bregun e Jordanit, Elia mori mantelin, e mbështolli dhe pastaj rrahu me të ujërat. Ujërat u ndanë sa andej këndeje dhe ata kaluan që të dy në të thatë. Nga larg po i shihnin bijtë e profetëve. Ç’mendonin ata?

- \* Se Elia ishte një mbinjeri.
- \* Se Perëndia ishte ende me Elian.
- \* Se ishte thjesht era që u hapi rrugën.

Ata do të shihnin se Perëndia ishte ende me Elian. Ai kishte qenë me Elian për vite me radhë dhe tani Ai sërish ishte me të. I ri dhe e re e krishterë, Perëndia do të jetë me ty çdo ditë të jetës tënde. Je duke ndërruar shkollën dhe ndjehesh i frikësuar. Nuk njeh asnjëri. Me vete mendoni: “Nuk dua të shkoj atje vetëm.” Ti nuk je vetëm. Perëndia është me ty. Premtimi i Tij për ty si i krishterë është: “Nuk do të të lë, nuk do të të braktis.” (Hebrenjve 13:5) Ai do të jetë me ty gjatë gjithë jetës, ashtu sikundër ishte me Elian.

Elia iu drejtua Eliseut: “Kërko çfarëdo që unë të bëj për ty, para se të më largojnë prej teje.” Dhe Eliseu e dinte ç’të kërkonte: “Të lutem, bëj që një pjesë e dyfishtë e frymës tënde të vijë mbi mua.” (Me fjalë të tjera Eliseu donte të kishte ndihmën e plotë të Elias për të përmbushur detyrën e tij.) Eliseu e dinte se zoti i tij, Elia, kishte fuqi e pushtet të madh nga Perëndia dhe ai e donte atë me qëllim që të përmbushte punën e Perëndisë. Por ajo ishte diçka që nuk mund t’ia jepte Elia. Vetëm Perëndia jep fuqi e forcë.

I rinj dhe e re e krishterë, e di se kur Zoti Jezus u kthye në qiell dërgoi Frymën e Shenjtë që të jetojë tek çdo njeri që e njeh atë

si Zot dhe Shpëtimtar. Pra, Perëndia jo vetëm është me ty, por Ai jeton në qenien tënde. Nëse i ke besuar Zotit Jezus si Shpëtimtarit tënd, Fryma e Shenjtë e Perëndisë jeton në qenien tënde. Ai do t'ju bëjë të fortë e me kurajë për të jetuar për Të. Ndoshta, në shtëpi s'rrini dot pa u zënë. Është gjë e mrekullueshme që Perëndia jo vetëm është me ju, por Ai është në qenien tuaj për t'ju ndihmuar të jetoni për Të. Eliseu e dinte nevojën e pushtetit të Perëndisë nëse donte të bënte punën e profetit. Kështu ai kërkoi: "Të lutem, bëj që një pjesë e dyfishtë e frymës tënde të vijë mbi mua." "Ti ke kërkuar një gjë të vështirë," iu përgjigj Elia. "Por, po të më shohësh kur të më largojnë prej teje, kjo do të të jepet."

### **Piktura 5-5**

#### *Elia shkon në qiell.*

Të dy njerëzit e Perëndisë vazhdonin udhën duke biseduar. Befas u shfaq një qerre e zjarrtë dhe kuaj të zjarrtë që i ndanë ata nga njeri tjetri. Elia u ngjiti në qiell në një shakullinë. Manteli i ra nga trupi në tokë. Eliseu e pa këtë dhe filloi të bërtasë: "O ati im, o ati im! Qerre e Izraelit dhe kalorësia e tij!" (Nëpërmjet lutjeve dhe predikimeve, Elia ruante Izraelin të paprekur, më mirë se ushtria e Ashabit.) Dhe Eliseu nuk e pa më Elian. Elia kishte shkuar në qiell pa vdekur. Pse shkoi Elia në qiell? Ai ishte i gatshëm të takonte Perëndinë, sepse ai kishte besuar Perëndinë për shpëtimin e tij. Po ti, a je i gatshëm të takosh Perëndinë? A do të shkosh edhe ti në qiell? Janë vetëm fëmijët e Perëndisë që do të jenë përgjithmonë më Të në Qiell. Ti bëhesh fëmijë i Perëndisë kur mbështetesh te Zoti Jezus të të shpëtojë nga mëkati, duke ditur se ai mori ndëshkimin tënd kur vdiq i kryqëzuar. A mbështeteni te Zoti Jezus si Shpëtimtari juaj? Nëse po, ti je fëmijë i Perëndisë. Bibla thotë : "Por të gjithë atyre që e pranuan, ai u dha pushtetin të bëhen bij të Perëndisë, madje edhe atyre që besojnë në emrin e tij." (Gjoni 1:12) "Të besosh në emrin e Tij" do të thotë të mbështetesh tek Ai. Nëse nuk mbështetesh te Jezus Krishti për t'iu hequr mëkatet tuaja, ti nuk je bir i Tij. Janë vetëm fëmijët e Perëndisë që e dinë se Perëndia është pranë tyre çdo ditë. Janë vetëm fëmijët e Perëndisë që do të jetojnë përgjithmonë me Të. Atje pra ishte Elia. Elia ishte me Perëndinë.

### **Piktura 5-6**

#### *Eliseu kthehet përmes Lumit Jordan.*

Çdo ndodhë më Eliseun? A do të jetë Perëndia me të? A do të merrte ai fuqinë dhe forcën që kishte Elia? Edhe vetë Eliseu duhet t'i ketë bërë këto pyetje.

Eliseu ndali, mori mantelin që i kishte rënë Elias nga trupi dhe u kthye prapa drejt lumit Jordan. E kujtoni si e kaloi lumin Elia me Eliseun? Kur Eliseu erdhi te lumi, ai mori mantelin e Elias dhe tha: "Ku është Zoti, Perëndia i Elias?" Kur Eliseu rrahu ujërat, ato u ndanë sa andej edhe këndeje dhe Eliseu kaloi. Perëndia po i tregonte atij se ai ishte zgjedhur realisht për të zënë vendin e Elias. Perëndia po ia bënte të qartë Eliseut se Ai ishte me të, ashtu sikundër kishte qenë me zotin e tij. Është kaq mirë të dish se Perëndia është me gjithë fëmijët e Tij. Ai nuk është vetëm me misionarët, predikuesit apo të moshuarit e krishterë. Nëse i ke besuar Zotit Jezus, Ai është edhe me ty. Ndoshta, në klasë keni edhe një shok të krishterë. E ke më lehtë në shkollë kur jeni dy të krishterë. Po shoku po lëviz me shtëpi dhe ti mendon se vetëm nuk mund të jetosh për Zotin Jezus. Edhe pse shoku yt i krishterë po largohet, Perëndia nuk të lë dhe kjo është më e rëndësishme. Ki gjithmonë parasyshe se nuk je vetëm. Perëndia do që ti ta dish këtë sot, ashtu sikundër donte që ta dinte edhe Eliseu shumë kohë më parë.

Bijtë e profetëve panë si u ndanë ujërat e Lumit Jordan. Kështu, ata mësuan se Eliseu ishte me Perëndinë në një mënyrë të veçantë, se ai ishte zgjedhur nga Perëndia të zinte vendin e Elias. Kështu, ata erdhën të takonin Eliseun dhe u përkulën deri në tokë përpara tij. Eliseu do të fillonte tani punën e tij për Perëndinë. Sa ndryshim ishte kur ai e dinte se Perëndia ishte me të, ashtu sikundër kishte qenë me Elian. Nëse je bir i Perëndisë, mos harro se Ai është gjithmonë me ty. Edhe kur ndjehesh i vetmuar, Perëndia është aty pranë teje. Shokët mund të të lënë, por Perëndia nuk të lë kurrë. Në fund të jetës, Perëndia do të të marrë në qiell, ku do të jesh gjithmonë me Të dhe Ai me ty. Ç'gjë e mrekullueshme të jesh bir i Perëndisë?

Ndoshta, thua me vete: "Po, por unë nuk jam bir i Perëndisë." A do që të jesh me të vërtetë bir i Tij? Nëse mbështetesh te Zoti Jezus, i cili u ndëshkua për mëkatet e tua, ti bëhesh bir i Perëndisë. Premtimi është "edhe ata që besojnë në emrin e Tij." A do t'i flasësh

Perëndisë heshturazi, duke i thënë: “Perëndi, dua me të vërtetë të bëhem Biri yt. Më fal për të gjitha mëkatet që kam bërë. Unë besoj se Zoti Jezus vdiq për mua dhe unë e besoj Atë

të më heqë mëkatet e mia.” Kur të bëhesh bir i Perëndisë, do ta kuptosh se Perëndia është gjithmonë me ty.

## **Përsëritëse për Mësimin Pesë**

1. Ç’po bënte Eliseu para se të thirrej për të zëvendësuar Elian?  
*(Punonte tokën.)*
2. Ç’donte të bënte Eliseu kur mësoi se Elia do të ikte prej tij?  
*(Ai donte të rrinte pranë tij).*
3. Në ç’qytete i tha Elia Eliseut të qëndronte e të mos shkonte me të?  
*(Në Gilgal, Bethel dhe Jeriko.)*
4. Cili ishte emri i lumit para të cilit erdhi Elia me Eliseun?  
*(Jordan.)*
5. Ç’ndodhi kur Elia rrahu ujërat me mantelin e tij?  
*(Ujërat u përndanë dhe ata kaluan në tokë të thatë.)*
6. Si e dimë se Perëndia nuk na lë kurrë vetëm nëse i përkasim Atij?  
*(Ai ka premtuar, “Nuk do të të lë.”)*
7. Ç’i kërkoi Eliseu Elia para largimit të tij?  
*(Një pjesë të dyfishtë të frymës së tij).*
8. Si shkoi Elia në qiell?  
*(Ai u ngjiti në qiell në një shakullinë.)*
9. Ç’duhet të bëjmë për të siguruar shkuarjen në qiell?  
*(Duhet të pranojmë Zotin Jezus Krisht, t’i besojmë Atij).*
10. Si e mësuam bijtë e profetëve se Perëndia ishte me Eliseun, ashtu sikundër ishte me Elian?  
*(Kur Eliseu rrahu mantelin, ujërat e Jordanit u përhapën.)*

# MËSIMI GJASHTË

## Elia Bisedon me Zotin Jezus

<b>Shkrimi i Shenjtë:</b>	Lluka 9:28-36; Mateu 17:1-8 dhe Marku 9:2-8. Tregoni gjithashtu edhe shpërftyrimin.
<b>E Vërteta Qendrore:</b>	Jezus Krishti është Biri i Perëndisë.
<b>Zbatimi:</b>	Për fëmijët e <b>pashpëtuar</b> : Besojini Atij për shpëtimin. Për fëmijët e <b>shpëtuar</b> : Dëgjojeni dhe binduni Atij.
<b>PLANI I MËSIMIT</b>	
<b>Fillimi:</b>	Të shikojmë sa shpejt do t'i radhisim këto fjalë!
<b>Zhvillimi e ngjarjeve:</b>	Perëndia dërgon Birin e Tij. VQ Zoti Jezus, Pjetri, Jakobi dhe Gjoni ngjiten në mal. Zoti Jezus lutet. Zoti Jezus shpërftyrohet. VQ Pjetri, Jakobi dhe Gjoni flenë. Shfaqen Elia dhe Moisiu, të cilët bisedojnë me Krishtin. VQP Dishepujt zgjohen. Pjetri sugjeron tre “çadra”. Një re zbret.
<b>Pika kulmore:</b>	Perëndia flet: “Ky është Biri im i dashur...” VQSH Dishepujt frikësohen. Moisiu dhe Elia zhduken. Zoti Jezus: “Mos kini frikë.”
<b>Përfundimi:</b>	Ata zbresin malin së bashku. VQSH + P
<b>Vargu që do mbajtur mend:</b>	<i>“Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetë të përjetshme.” (Gjoni 3:16).</i>

## MËSIMI

(Mësues: shkruani me renditje të çrregullt fjalët **I DREJTË ( I EJTËRD); I MADH ( I MDHA); I DURUAR (I URUARD); I PLOTFUQISHËM**. Ndërsa fjalën **DASHURI (HURIDAS)** mbajeni gati. Vendosini fjalët e shkruara në tabelë.)

Të shohim sa shpejt mund t'i rendisim saktë këto fjalë! Lërimi fëmijët ta kryejnë këtë detyrë. Të gjitha fjalët në tabelë përshkruajnë Perëndinë, i cili sikundër kemi mësuar cilësohet me mbiemra të tillë. Kam edhe një fjalë tjetër të shkruar me renditje të çrregullt: **HURIDAS**. Ç'është kjo fjalë?

### Piktura 6-1

Bibla na thotë se Perëndia është dashuri. Ai e ka shfaqur dashurinë e tij në forma të mrekullueshme. 900 vjet pasi Elia kishte shkuar në qiell, Perëndia dërgoi në tokë Birin e Tij. “Sepse Perëndia e deshi aq botën, sa dha Birin e tij të vetëmlindurin ... (Gjoni 3:16). Biri i vetëm i Perëndisë la qiellin dhe erdhi në tokë. Ai lindi si një fëmijë i vogël. Zor se e dinte njeri se kush ishte në të vërtetë.

Kur u rrit, Ai u mësoi njerëzve për Atin e Tij në qiell. Ai shëroi shumë njerëz të sëmurë, madje ktheu në jetë edhe njerëz të vdekur. Ai



i bënte këto se ishte Perëndia Bir. Ai është i madh dhe i gjithëfuqishëm.

Ai thirri dymbëdhjetë vetë të ishin dishepujt dhe pasuesit e Tij. Këta njerëz kaluan shumë kohë bashkë me Të. Ai u mësoi atyre shumë gjëra. Dita ditës, atyre iu përforcohej mendimi se Ai ishte ndryshe, se Ai ishte me të vërtetë Biri i Perëndisë.

### **Piktura 6-2**

*Jezusi dhe dishepujt e Tij ngjisin malin.*

Një ditë, Ai ftoi tre dishepujt e Tij, Pjetrin, Jakobin dhe Gjonin të ngjiteshin në mal për t'u lutur. Ai i lejoj këta dishepuj të shihnin diçka që askush në botë nuk e kishte parë. E gjeni se kush tjetër e ka parë atë - Elia! A nuk është kjo një çudi! Ai kishte shkuar në qiell qindra vjet më parë, dhe megjithatë e kishte parë atë. Si është e mundur? Ç'panë dishepujt në të vërtetë? Shumë shpejt ne do ta mësojmë përgjigjen e kësaj pyetjeje.

Të tre dishepujt u kënaqën duke iu ngjitur malit përpjetë. Po i kënaqur ishte dhe vetë Jezusi. Ai i donte malet, lulet, zogjtë dhe gjithçka tjetër të mrekullueshme që Ai vetë e kishte krijuar. Dhe Bibla thotë: "Të gjithë gjërat u bënë me anë të tij...." (Gjoni 1:3) Zoti Jezus, Pjetri, Jakobi dhe Gjoni duhet të kenë biseduar për Atin Qiellor tek i ngjiteshin malit përpjetë. Pas pak kohe ata ndalën, sepse Zoti Jezus donte të fliste me Atin e Tij. Ai donte të lutej. Ai u largua pak më tutje nga dishepujt e tij. Perëndia - Bir bisedonte me Perëndinë - At.

### **Piktura 6-3**

*Zoti Jezus duke u lutur.*

Dhe ndërsa po lutej, u vu re një ndryshim i madh. Fytyra filloi t'i ndriçonte njësoj si dielli. Veshja e tij u bë e bardhë dhe e ndritshme si dëbora. Ç'po ndodhte? Ky shkëlqim vezullues quhet lavdi. Qielli është i mbushur me lavdi. Kur Biri i vetëm i Perëndisë u largua nga qielli, Ai e mbajti lavdinë të fshehur. Kështu, kur njerëzit e takonin Zotin Jezus në rrugë, ata nuk shikonin ndonjë ndryshim tek Ai. Ai dukej njësoj si njerëzit e tjerë. Por tani lavdia e Tij po shndriste, duke treguar se Ai është Perëndia Bir. Ç'pamje e habitshme dhe e shenjtë! Ç'po bënin Pjetri, Jakobi dhe Gjoni? A panë gjithçka që ndodhi? Jo, ata kishin rënë në gjumë të thellë.

### **Piktura 6-4**

*Elia dhe Moisiu bisedojnë me Zotin Jezus.*

Ndërsa ata flinin, erdhën dy burra dhe biseduan më Të. Njëri ishte Elia dhe tjetri Moisiu. Ndoshta, menduat se historia e Elias mori fund me ngjitjen e tij në qiell. Sot kemi mësimin e fundit rreth Elias. Qindra vjet pasi shkoi në qiell, ai erdhi në tokë të bisedonte me Zotin Jezus. Perëndia i dërgoi këta njerëz nga qielli të vinin të bisedonin me Birin e Tij! Pse i dërgoi Perëndia këta dy njerëz? Bibla nuk thotë pse. Mund të ketë qenë, sepse Perëndia ia dha Ligjet e Tij, Dhjetë Urdhërimet, Moisiut dhe Zoti Jezus ishte i vetmi që zbatonte përsosmërisht Ligjet e Perëndisë. Elia ishte profet dhe të gjithë profetët mezi prisnin të shihnin të vinte Njeriu i Premtuar. Dhe Ai kishte ardhur. Perëndia kishte dërguar Birin e Tij të vetëm. Ç'gjë emocionuese! Zoti Jezus në lavdinë dhe madhësinë e Tij po bisedonte me Moisiun dhe Elian. Po përse bisedonin? Përse mund të bisedonte Elia? Do të bisedonte për garën e madhe në Malin Karmel? Jo! Po Moisiu? Do të bisedonte për rrugën që hapi Perëndia përmes Detit të Kuq? Jo! Biseduan për qiellin nga ku sa po kishin zbritur? Përsëri jo! Ata kishin diçka më të rëndësishme për të biseduar. Ata biseduan për ngjarjen më të rëndësishme që do të ndodhte në botë. Dhe ç'ishte kjo ngjarje? Vdekja e Zotit Jezus. Ata biseduan rreth asaj që do t'i ndodhte Zotit Jezus në Jeruzalem fill pas kësaj bisede. Kur Zoti Jezus vdiq, vdekja e tij ishte ndryshe nga ajo e njerëzve të tjerë. Ai u kryqëzua në kryq. Asokohe, shumë njerëz vdisnin të kryqëzuar. Por vdekja e Zotit Jezus ishte ndryshe. Kur Ai vdiq, Perëndia e ndëshkoi atë për mëkatet e njerëzve si ti dhe unë. Ky ishte një ndëshkim i tmerrshëm. Teksa Biri i Tij varej i kryqëzuar, Perëndia - At e la Atë. Ai vuajti zemërimin e Perëndisë për mëkatet. Vetëm Biri i Perëndisë mund të merrte mëkatet e gjithë botës dhe të ndëshkohej për të. Sepse e bëri këtë, Ai është Shpëtimtari i vetëm. Ai mund të marrë mëkatet tënd. Ai mund të të shpëtojë nga mëkati që meriton.

Ti meriton të shkëputesh nga Perëndia përgjithmonë. Bibla e quan këtë "vdekje". Jezus Krishti mund të të shpëtojë nga vdekja. Ai mund të ndryshojë jetën tënde. Por ti duhet ta besosh që ta bëjë këtë për ty. Nëse realisht do që ta besosh Atë, dhe nuk din si, eja të

bisedojmë së bashku pas mësimit. Unë do të jem - caktoni vendin ku do të jeni. Unë do të jem i (e) gëzuar të të ndihmoj në këtë drejtim nëpërmjet Biblës. Mos harro se Jezus Krishti mund të të shpëtojë, sepse Ai është Biri i vetëm i Perëndisë, që vdiq për mëkatet tona.

Nuk është e habitshme që Moisiu dhe Elia të kenë folur për vdekjen e Tij. Po profetët e tjerë nuk do ta përjetonin këtë çast? Pas një farë kohe, profetët u zgjuan nga gjumi. Ata s'kishin parë kurrë një gjë të tillë. Ata po shikonin shkëlqimin Qiellor dhe lavdinë. Ishte kaq e habitshme dhe e mrekullueshme sa dishepujt filluan të frikësohen. Pjetri filloi të bisedonte, pa ditur me të vërtetë se ç'po thoshte. "Mësues, për ne është mirë të rrimë këtu. Le të bëjmë tri çadra: Një për Ty, një për Moisiun dhe një për Elian."

### **Piktura 6-5**

#### ***Një re zbret poshtë.***

Zoti Jezus nuk dha përgjigje, sepse ndërsa Pjetri po fliste erdhi një re që i mbuloi në hijen e vet. Një zë doli nga reja. Ishte zëri i Atit Perëndi. Ai iu tha dishepujve: "Ky është Biri im i dashur; dëgjojeni Atë." Perëndia po shpallte se Jezus Krishti ishte Biri i Tij. Atje në mal, Perëndia po u jepte dishepujve një mësim të madh. Është një mësim që Ai do që ta mësojmë edhe ne sot. Ai do që ne ta dimë mirë në thellësi të qenies tonë se nuk ka person tjetër si Jezus Krishti. Moisiu dhe Elia ishin njerëz që i kishin shërbyer Perëndisë, por ata ishin thjesht qenie njerëzore. Ata kishin gabuar, madje shpesh kishin mëkatuar. Kurse Zoti Jezus ishte ndryshe. Ai ishte njeri, por ishte edhe Bir i Perëndisë. Ne e dimë se Perëndia përbëhet nga - Ati, Biri dhe Shpirti i Shenjtë. Kjo njihet si Trinia. Jezus Krishti është njëri nga përbërësit e kësaj trinie. Ai është shpëtimtari i vetëm. Jezus Krishti është pikërisht Ai, që Perëndia kërkon ta dëgjojmë e t'i bindemi.

Në shkollë ndoshta njiheni edhe me besimet e tjera. Mësuesi u thotë se për të shkuar në qiell, te Perëndia ka shumë rrugë. Si i krishterë duhet të dish fjalët e Jezus Krishtit dhe t'i besoni ato. Jezus Krishti ka thënë: "Unë jam udha; askush nuk vjen tek

### **Pyetje Përsëritëse për Mësimin Gjashtë**

1. Cilët ishin tre dishepujt që ngjiten malin me Jezus Krishtin për t'u lutur?  
*(Pjetri, Jakobi dhe Gjoni.)*
2. Ç'i ndodhi Zotit Jezus tek i lutej Atit të Tij?  
*(Fytyra filloi t'i shkëlqente si dielli, ndërsa veshja iu bë e bardhë.)*

Ati përveçse nëpërmjet meje." (Gjoni 14:6) Dëgjojeni atë, besoni atë që thotë Ai.

Ndoshta një shoqe të kërkon të shkosh në shtëpi të shikosh një videokasetë. Ajo të ka folur diçka rreth kësaj videokasete. Ti e di se kjo është një videokasetë që Zoti Jezus nuk e pëlqen. Do të dëgjosh shoqen tënde, apo Zotin Jezus, Birin e Perëndisë dhe Shpëtimtarin tënd? Kjo është ajo ç'ka po u thoshte Ati i Madh tre dishepujve të mbuluar nga reja.

### **Piktura 6-6**

Dishepujt i zuri frika. Ata u ulën me fytyrën për tokë, pa guxuar të shikonin përsëri. Zoti Jezus erdhi dhe i preku ata. "Mos kini frikë," tha Ai.

Të tre dishepujt ngritën sytë. Reja kishte ikur. Moisiu dhe Elia ishin zhdukur. Ishte vetëm Zoti Jezus, pa lavdinë e tij shndritëse. "Dhe tani le të zbresim poshtë malit," tha Ai. Tre dishepujt nuk do ta harronin kurrë atë që panë e dëgjuan. Ata e dinin pa kurrfarë dyshimi kush ishte Jezus Krishti - Biri i vetëm i Perëndisë!

I ri dhe e re e krishterë, mos harro se kush është Shpëtimtari yt. Në qoftë se ti duhet të zgjedhësh nëse do të dëgjosh fjalën e tij apo fjalën e dikujt tjetër, dëgjo Fjalën e tij. Bindu gjithmonë Atij edhe atëherë kur të mashtrojnë për t'ju futur në udhë të gabuar.

Nëse nuk je i krishterë dhe vazhdon në udhën tënd, mëkati do të të ndajë për jetë nga Perëndia. Ekziston vetëm një Person që mund t'ju heqë mëkatin e t'ju bëjë të krishterë të vërtetë. Ky është Jezus Krishti, Biri i Perëndisë. Ti ke shumë, shumë nevojë për Të. Dëgjoni se ç'thotë Zoti Jezus: "Sepse Perëndia e desh i aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetë të përjetshme." (Gjoni 3:16). Nëse i beson Jezus Krishtit të të shpëtojë nga vdekja, Ai do ta bëjë atë e do të të pastrojë nga mëkati. Thojini Atij në thellësi të shpirtit tuaj se ti ke nevojë për Të. Falënderojë që ka vdekur për mëkatet e tua, kërkoji që të të shpëtojë nga vdekja qysh tani. Dhe atëherë Jezus Krishti, Biri i Perëndisë, do të jetë Shpëtimtari yt.

3. Kush u shfaq në mal me Zotin Jezus?  
(*Elia dhe Moisiu.*)
4. Përse bisedoi Jezusi me Moisiun dhe Elian?  
(*Për vdekjen e tij në Jeruzalem.*)
5. Ç'po bënin dishepujt para se ta shihnin Zotin Jezus në lavdinë e Tij?  
(*Po flinin.*)
6. Cili ishte reagimi i Pjetrit?  
(*Pjetri tha: "Mësues, për ne është mirë të rrimë këtu. Le të bëjmë tri çadra.*)
7. Ç'u tha Perëndia -At për Zotin Jezus?  
(*"Ky është Biri im i dashur; dëgjojeni Atë."*)
8. Ç'bënë dishepujt kur dëgjuan Perëndinë të fliste nga qielli?  
(*Ata ranë përmbys në tokë, të frikësuar.*)
9. Kush ishte aty kur të tre dishepujt ngritën sytë?  
(*Vetëm Jezus Krishti.*)
11. Ç'fjalë mungojnë nga ky varg: "Sepse Perëndia e deshi aq botën, ... që, kushdo që beson në të, të mos humbasë, por të ketë jetë të përjetshme." (*Shiko Gjoni 3:16*)